

JUAN

Juaman huishani joi siri

Papan joi hihbo jonihi

1 ¹Jahuabi jaríyamanon ta Papan joi hihbo janishqui. Papa Dios betan jihueti. Papan joi hihbo ta Papan shinanyahpa qui. Dios bi res ta jaa joi qui. ²Naiyahpa mai jaríyamanon ta Papa Dios betan jaa joi hihbo janishqui. Jahuen jane cahen Jesus. ³Jaan ta jatihibi janishqui. Jaan hahyamani quen ta jahuabi yamaquehanihqui. ⁴Jaan ta jatihibi yoshinyahpabojaquin jihuemanishqui. Jaa noquen jihuemanicah ta noquen xaba qui. ⁵Bahquish chian xabatai bi cahen yamepan bahquishjayamaquin. ⁶Noquen xaba hihbo ta jahuiqui hihqui jonon ta Juan janeya joni Papan raannishqui. ⁷Jaa ta xaba hihbo qui hihxon yohicoini jonon. Joxon, jatihixonbi nincacoinahbo hihxon jato yohicoinquin. ⁸Jaa Juan cahen xaba hihquishma bi xaba hihbo qui yohicoini jahui. ⁹Jaa xaba hihbo ta jatihibi joni xabajanicah qui. Xaba hihbo hihquish bi cahen noque janin jaa jahui. ¹⁰Jan hahni nete janin jaabi jahue que bi cahen jano jihuetaibaan huetsapahascaquin, jaabi que bi. ¹¹Jaton caibo que bi Johue hahyamacanquin, jaanbi hahni nete janin nocotai bi. ¹²Caibaan res Johue hahquin. Jaa Johue hahcaibo cahen: Diosen baquebo sca

janahue, mato rahsibi, hea nincacoinaibo rahsi, xabapan jato jaquin. ¹³Jaa Johue hahcaibo Papa Diosen baquebo hihnon, jimiyahpa papa janonma bi queeyahpa papajomabo hihnon, bebaan baquejaha hihnonma bi: Papan baquebo janahue xabapan jato jaquin.

¹⁴Yorayahpahax ta noque betan jaa Papan joi hihbo jihuenishqui. Jan hihti coshin hahcai tah non jisniqui. Jaa huesti jahuen papa xohtahi, nete hihbohi. Yohuani hihcoina. Shinanyahpa siri. ¹⁵Hahqui chanicoini cahen Juan coshin yohuani, nescari:

—Hoa ta hen mato yohipi noque qui, hea pari jomenoni que bi ta hehchon jahui noquen hea mahuinihqui, jaa pari jihue hihbonixon —hihqui. ¹⁶Jahuen shinan hihti caibohi tah non jatihixonbi bihniqui, jaan hinanresah. ¹⁷Xabapan shinan non bihnon hihxon ta Papan Moises yononishqui, noquen nincati joi Moisesnin huishanon. Jaa pecaho ta Jesucriston sca jahuen shinan noque hinanresiqui, hihcoina joi non honannon, noquehon Papan shinanai non honannon. ¹⁸Tsoanbi ta noquen Papa Dios jisyamanishqui, jahuentianbi. Non jisyamani bi ta hahan jan shinanai jahuen baquen noque yohiha, jenquetsahpa noquen Papa Dios quin non honanscai.

Jesucristo ta Papan baque qui*(Mt. 3.11-12; Mr. 1.7-8; Lc. 3.15-17)*

¹⁹Yocacahbo hihxon ta Jerusalem janinha judiobaan jaton sacerdoteyoya levitobo Juan qui raannishqui.

—¿Mía min tsoa quin? —Juan yocacahbo. Yocacahbo ta jato yohicoinnishqui. ²⁰Paranxonma jato yohicoinquin:

—Hea ta hen Cristoma qui —hahquin.

²¹Jasca jan jaiya, yocarihbianquin:

—¿Tsoa min quin? ¿Mía min Elías yamanica quin? —hahcanquin.

Jascahahbo bi:

—Hea ta jaama qui —hahquin.

—¿Hoa Dios joi yohinica nan?

—hahscacanquin.

—Hea ta jaama rihbi qui —hahquin.

²²Jaatian yocarihbianquin:

—¿Tsoa min quin? Noque

Yocatannahue hahecaibo non yohihi sca canon, Jaa ta hen qui noque jahue, mianbi —hahcanquin.

²³—Cahchihoxon quenahi ta hea qui, Hihbo hahan jonon bahi najisti chai jaxonnahue hahnicah. Papan joi yohinica hihxon Isaiasnen noque yohini quescabijaquin tah hean jai —jato jaquin.

²⁴Yohihahbaan bi fariseobaan sca hahquiritihbi raanah, yocarihbianquin:

²⁵—¿Jahua copi min Cristo hihxonma bi min jato nashimahin, Elías rihbi hihxonma bi, hoa Dios joi yohinica rihbi hihxonma bi min nashimahi nan? —hahcanquin Juan yocaquin.

²⁶—Hean ta hen jenen res nashimahi. Mato tocan ta man honanyamahi joni nichiqui. ²⁷Hehchon jahui que bi tah hen jahuen sapato risbi pecaxonti senenyamahi, jaa hihti siri copi —Juaman jato jaquin. ²⁸Jordan huean hoque quexaxon, janoxon Juaman jato nashimahi janinxon bi ta jascajaquin yocacannishqui, Betania jema janinxon.

Jesus ta Papan carnero qui

²⁹Huetsa bahquish sca jari Jesus jahui qui jisxon, Juaman jato yohiquin:

—Jisnahue. Hoa ta Papan carnero joni qui, main jihuetaibaan hohcha copi mahuayaxihqui joni. ³⁰Hen mato yohihipi tah qui, Hehchon jahui jonin ta hea mahuinihqui, jaa pari jihue hihbonixon hahquin. ³¹Hean rihbi jaa honannixonma bi tah hen israelibaan jaa jisxon honannon hihxon hean jenen nashimahi joníqui —Juaman jato jaquin. ³²Jato jascajaxon yohirihbicoinquin:

—Naihoh quehax Dios Yoshin

botopaquetax, nobex quescapa hahqui bototi manahi jahui tah hean jisoqui.

³³Jaa tsoa quin tah hean rihbi honanyamanihqui. Hen honanyamahi bi ta Papan hea yononishqui, jenen nashimahi hea jonon. Botopaquetax heen yoshin siri jaa manahi jahui min jis yaxihqui ta heen yoshin siri bichibo nashimaquin hahcajanichah qui, heen yoshin siri jato hinanquin, hih ta Papa jahoxqui. ³⁴Jan jascajahi jisxon ta hen mato yohicoinal: Papa Diosen baque tah qui —Juaman jato jaquin.

Jesusen caismenonibi

³⁵Huetsa bahquish sca, jahuen haxenica rabe betan nihribixon, ³⁶Jesus nichí jisxon:

—Jisnahue. Jaa ta Papa Diosen carnero qui —jato jaquin. ³⁷Jan jascarai nincacax rabe bi jahuen haxenica cahí, Jesus chibani sca. ³⁸Rabejaquexon, chibanai jato meraxon Jesusen jato yocaquin:

—¿Jahuejahi man behin? —jato jaquin. Yocacah:

—¿Jahuen min jihuetaín, Rabin?

—hahcanquin. Rabin ta maestron hihcatsihquiqui.

³⁹—Jisi benahue —hahscaquin. Jaatian boresscaxon, jan jano jihuetai jisish,

bepiscaiya jaa netenbi jahuen xoboho banecani. ⁴⁰Huesti ta Andres janishqui, Simon Pedro huetsa. Huetsa joni betan nihxon, Juan yohuanai nincaxon, Jesus res sca chibanquin. ⁴¹Jahuen huetsa Simon benaxon meraxon:

—Mesías tah non merascai —hahquin. Mesías cahen Papan raanah joni hihcatsihqui, Cristo, jaton join.

⁴²Jascjaxon, Jesus janin Simon hioquin. Nocotaiya bejixson Jesusen yohiquin:

—Mia tah min Simon qui, Juaman baque. Cefas janeya sca tah min jayaxihqui —hahquin. Cefas ta macan hihcatsihqui.

Felipeya Natanael Jesusen quenahi

⁴³Huetsa bahquish sca Galilea main cacatsihquin Felipe meraxon:

—Hehbe cahue —hahquin Jesusen. ⁴⁴Betsaida jema janin ta Felipe jihuepahonishqui, Andres betan Pedro jero jihuepahoni janin. ⁴⁵Natanael meraxon, Felipenin yohiquin:

—Papan joi huishaquin Moisesnin yohini joni tah non meratanai. Papan joi yohinicabaan rihbi hahqui huishaxon yohini. Josepan baque Jesus tah qui, Nazaret janinhah —hahquin.

⁴⁶—¿Nazaret janinha jahua siri jatihiquin? —hihqui Natanael.

—Jisihue —hahscaquin Felipenin.

⁴⁷Natanael hahqui nocoti jahui jisish Jesus yohuani:

—Jisnahue. Jaa ta israeli baque coin qui, paranyosma joni —hihqui.

⁴⁸—¿Jenquetsahaxon min hea honanain? —hahquin Natanaelnin.

—Higo jihui naman tsahotai ta hen mia jisiqui, Felipenin mia quenarihyamanon —hahquin Jesusen.

⁴⁹—Mia tah min Papa Diosen baque qui, Maestron. Mia tah min israelibaan quiquin hapo qui —hihscai Natanael.

⁵⁰Jesusen sca Natanael yohiquin:

—¿Higo jihui naman tsahotai ta hen mia jisiqui hen mia jaiya min nincacoinain? Heen coshiyaxon hahcai tah qui. Hashoan rihbi heen coshiyaxon hen hahcai tah min jis yaxihqui.

⁵¹Yohicoin ta hen mato jai: nai huiso quehpemehtaiya hea janinhax hinahihnatax hea noquebaque qui nocoti botopaquetai tah man Papan yonotibo man jis yaxihqui —jato jaquin.

Caná jema janinxon huanomahibo

2 ¹Jan jascahipi quimisha neten sca Galilea main huanomahibo jai, Caná jema janin. Quenamaha jano rihbi Jesusen mama cahi. ²Jahuen haxenicaboyabi canon Jesus rihbi quenamacanquin, huanohihbo jisi canon.

³Jaton xehati queyoscaiya:

—Hompa ta yamascaiqui, baquen —hihqui jahuen mama.

⁴—¿Min jascaraiya bi jahueja hen jatihin, maman? Heen coshiya teeti nete ta nocorihyamahiqui —hahquin Jesusen.

⁵Xehamanicahbo sca:

—Jaan mato yohihi quescajianahue —jahuen maman jaquin.

⁶Janobi rihbi cahen seis macan poo tsahoti jene paxa hahqui bexojatibo. Hanibo poo can, huesti cuñete hihyamahax rabe cuñete betan senenai tihopabo, hahan judiobo mechoquiti, tachoquiti, jaton hihti quesdari.

⁷—Poo qui jene bohasaxonnahue —jato jaquin Jesusen. Jaatian bohasabahincanquin.

⁸—Huehaxon, fiesta hihbo nomimatannahue —Jesusen jaah sca, huehaxon nomimacanquin. ⁹Jaa jene hompacahinscai bi fiesta hihbaan tanaquin. Tanaxon bi jahuerahnohah hin honanyamaquin. Jene bihtanaibaan honanai bi fiesta hihbaan honanyamaquin. Tanaxon jahuen huanoni quenaxon sca fiesta hihbaan yohiquin:

¹⁰—Pahenscaiton jato tiroma xehati xehamanoxon tah non siri pari jato hahmanica qui. Mian tah min rahma pari hompa siri cainmahi —hahquin. ¹¹Galilea mai janinhah Caná jema janinxon ta Jesusen jascajamenquin hahan honantjanishqui. Jahuen coshi jato jismahah cahen jahuen haxenicabaan nincacoinscaquin, Papan caisai joni hihqui honancoincaquin.

¹²Jaa pecaho jahuen mama, jahuen jochicabo rihbi, jahuen haxenicabo rihbi Capernaum janin hahbetan cahax nocotax jahuentihi ra netebo jano baneti, basima tahni.

Papan xobo tiromajahibo Jesusen jabamahi
(Mt. 21.12-13; Mr. 11.15-18; Lc. 19.45-46)

¹³Judiobaan pascua fiesta nea pishcascaiya Jerusalem janin Jesus cahi. ¹⁴Nocoxon Papan xobohoxon jaton ganadoya carnero maromahiton jascapa maromanicahbo meraquin. Nobex maromanica joniboya coriqui mahnenannica jonibo rihbi jano tsahotai merarihbiquin. ¹⁵Jascajahiton meraxon risbipan hahan rishquitijaxon jeman jato potaquin. Jatihibi potaquin, jaton ganadaboya jaton carneroboya bi. Jaton coriqui napabohanson coriqui misa rihbi behonjanquin. ¹⁶Nobex maromanicahbo sca yohiquin:

—Nescapahbo botannahue. Heen papan xobohoxon jascajayamanahue. Janoxon marotima tah qui —jato jaquin. ¹⁷Jato potahi jisxon, Hea tah hen miin xobo hihti jenipahichai jaa jiscatsihqui, hihqui neateman huishani joi jahuen haxenicabaan shinanscaquin. ¹⁸Jahuen haxenicabaan sirijaquin shinanai bi judiobaan sca joi bichinquin:

—¿Jahua hahan honanti min noque jismahin, nescajanoxon? —hahcanquin.

¹⁹—Nea xobo potojaquetannahue, quimisha nete huinoxon hen jaa

xahnenenbi hahribinon —Jesusen jato jaquin.

²⁰—¿Cuarenta y seis bari teexon janquenjanibo xobo min quimisha neten xobojaquin queyotihin? —hahcanquin. ²¹Jahuen yora yohihi jan hihqui bi janoxon Papa Dios yocati xobo yohihi shinancaquin. ²²Hihquipish bi teehihrihbihiya pari ta jan jascajaquin jato yohiho jahuen haxenicabaan shinanscanishqui. Shinanax, Hihcoini Papan huishamani joi ta jaa yohihi jaiqui, noquen Hihbo Jesusen rihbi ta noque jascajaquin yohinishqui, hihcani.

Jatihibi jonibo Jesusen honanai

²³Pascua fiesta tian Jerusalem janinxon hahan honantibo Jesusen hahcai jisxon:

—Papan caisai noque tah qui —hahcanquin hicha jonibaan.

²⁴Jascaraibaan bi jato jatihibi honanax jato tocan Jesus nihresyamahi. ²⁵Jatihibi jonibaan shinanai jaanbi jahuen jointinin honanscai copi, Jasca ta shinancaiqui hihnica pishinyamahi.

Jesus qui Nicodemo nocoti

3 ¹Huesti fariseo joni ta judiobaan hacannica hihpahonishqui, Nicodemo janeya joni. ²Jesus qui yame caxon yohiquin:

—Noque honanmahi mia jonon ta mia Papan raannishqui, Maestron. Non tah non honanai. Mian tah min hahan honantibojahi. Mihbetan Papa Dios hihyamahiya cahen min jascajati hahtipahyamahan —hahquin. ³Jaatian:

—Mia tah hen yohicoinai. Behnajaquin jonijahama jonin ta Papan jihue jistimabiresiqui —Jesusen jaa jaquin.

⁴—¿Yosibohax non jenquetsahax hahquirihbi jonitihin? Noquen maman xahquin janin non hahquirihbi hihquitihin, jonirihbinonoxon? —Nicodemonen Jesus jaquin.

⁵—Mia tah hen yohicoinei: Dios Yoshiman jonijahama joni ta Papan jihue janin hihcotimabiresihqui. Jenen rihbi jonijahama joni ta jano hihcotimabiresihqui. ⁶Namin jonijaha ta yorayahpa qui. Dios Yoshiman jonijaha ta yoshin rihbi qui. ⁷Hahquirihbi joniti tah min jai hen mia jaah bi rahteyamahue. ⁸Jano jan queenaiton ta nihue cahiqui. Jahuerahnohax cainax jahuen cahiquin tah min honanyamahi, xoo hihqui nincaxon bi. Dios Yoshiman jonijaha jatihibi ta jascarihbi qui —Jesusen jaquin.

⁹—¿Jaa min yohihi jenquetsahatihiquin nan? —hihqui Nicodemo. ¹⁰Jesusen sca yohiquin:

—¿Israelibaan honanmanicahxon bi min hean mia yohihah min honanyamahin? ¹¹Yohicoin tah hen mia jai: Honanxon non mato yohihah bi tah man nincayamahi. Jisxon non yohihah bi tah man nincayamahi non hihcoinei bi. ¹²Nea mai meha joi yohihah bi nincacoinyamaxon tah man jenquetsahaxon bi naihoh queha hen mato yohihi joi nincacointimahi.

¹³Tsoabi naihoh catanni que ma bi tah hen janohax botopaquetai hea huesti jano canicah qui, hea noquebaque.

¹⁴Nincacoinaibo queyoyamanox mananon ta cahchihoxon Moisesnin rono nichinhihninoxon jihuin hueonni quescajaquin hea noquebaque nichinhihninoxon hueonyaxihcanihqui. ¹⁵Hea noquebaque qui hinamehxon nincacoinaibo jatihibi ta queyoyamanox manatihiqui.

Main jihuetaibohon Papa Dios hihti queenai

¹⁶Nai nequebihabo hihti queenxon ta jahuen baque hea huesti Papan raannishqui, hinamehxon nincacoinaibo jatihibi queyoyamanox mananon, tsoabi

mehtexehtaxma jihuenon. ¹⁷Main jihuetaibo casticani jonon hihxonma bi hen jato jihuemahi jonon hihxon ta Papan hea raannishqui.

¹⁸Nincacoinai jonibo ta jahua copi casticantimabo qui. Nincayosma jonibo ta casticanscatihiqui, Papan baquen yohihah bi jahua nincayamahibo. ¹⁹Mai janin xaba jahue que bi ta xaba jenipahiyamacaniqui. Yame caya ta jenipahicaniqui tiromabohax. Jaa copi ta jato casticanyaxihquiqui. ²⁰Nenoxon tiromajahibo rahsi ta johue jiscatsihyamahax xaba quiri cayosmabo qui, tiromajahibo caibaan jismis hihquish xaba quiri cayamahi. ²¹Hihcoinaibo ta xaba quiri canicah qui. Papan jisi hah ta jaan jaiqui caibo hihnon hihquish —Jesusen Nicodemo jaquin.

Juan Jesus qui yohuani

²²Jaa pecaho ta jahuen haxenicabo betan Jesus canishqui Judea mai janin. Jano jato betan banexon nincacoinaibo hihquimatanquin nashimaquin. ²³Enon jema janinxon Juaman rihbi nashimaquin Salim hochoma jano noayahpa huean jaiton. Juaman jato nashimanon caibo jano cahi. ²⁴Sipo xoboho Juan tsahonrihyamahiboya jano jonibo bocani.

²⁵Jascascahiya Juaman haxenicabo betan judiobo yohinani:

—¿Jenquetsahaxon non noquen hohcha potatihin? —hihqui yohinani rainyamahi. ²⁶Juan qui caxon sca yohicanquin:

—Jordan hoque quexa mia manatipi jonin rihbi ta nashimahiqui, maestron. Min noque yohicoinei joni tah qui. Jise. Hahqui sca ta jatihibi bocanishqui —hahcanquin. ²⁷Jascahahbo jato yohiquin:

—Papan noque hinanyamahah tah non tsoabi jenquetsahpabi bihti hahtipahtimahi. ²⁸Hea ta hen Cristoma

qui. Hean pari yohixononi jonon hihxon res ta Papan hea yononishqui. Hen jascahipi tah man matonbi honancoinai. ²⁹Nesca tah qui, jisnahu. Jahuen haibo hihnon cahen bebo huanocatsihqui. Jan yohuanai ta jano rihbi nihxon jahuen hahberabetinin nincatihiqui. Jan yohuanai nincacax coincoini. Jascarihbi ta hen hea coin coini jai. ³⁰Caiti ta jaa jaiqui. Jahua hihtima ta hea jai —jato jaquin.

Bochiquihax jahui joni

³¹Bochiquihax jahui jonin ta jatihibi joni hihbojahiqui. Mainxon jonijahabo ta mainxon jisish jan jisiboya yohuanihqui. Naihoh quehax jahui joni ta jatihibi jonibaan hihbo qui. ³²Naihohxon jisnibo yohuancoi jan jai bi ta tsoanbi nincacoinyamahihqui. Jan nincanibho yohuancoi rihbi jan jai bi ta tsoanbi nincacoinyamarihbihihqui. ³³Jan yohicoinah nincacoinaibo ta Papa Dios ta hihcoinnicah qui hihquiqui. ³⁴Papan raannica joni hihxon ta Papan joibo yohihiqui. Hahqui ta jahuen yoshin siri Papa Dios yohuashihyamahiqui. ³⁵Jaa jahuen baquehon queenxon ta Papan jatihibi jaa hinannishqui, jaan sca hihbojanon. ³⁶Jaa Papan baque qui hinamehxon nincacoinai joni ta queyoyamanox manatihiqui. Jahuen baquen yohihah bi nincayamahi joni ta jihuetimahiqui. Jascapa ta Papan hihti jistahihmahiqui, hahquin.

Samaritano haibo Jesusen yohuanquihnai

4 ¹Juaman honanmaxon nashimahi mentan hashoan hihti caibo Jesusen honanmaxon nashimahi cahen fariseobaan nincascaquin. ²Jaanbi Jesusen nashimayamahi bi ta jahuen haxenicabaan res nashimanishqui. ³Jahuen nashimatibo caichai fariseobaan joi nincacai honanxon Judea mai Jesusen potabahinquin, Galilea main caribinoxon.

⁴Galilea main canoxon cahen Samaria mai nabebacahinti jai. ⁵Cahi, Samaria mai meha jema janin nocoti, Sicar janeya jeman. Jacobonen jahuen baque José hinanni mai hochomahi. ⁶Jene bihnoxon ta janobi Jacobonen mai poquinnishqui. Poquinxon chiquerihbiquin. Jano sca ta Jesus noconishqui. Bahin nihnichi paxquinax, barin manan tsacahiya jaa mai poquin quexa Jesus tsahopaqueti. ⁷⁻⁸Jahuen haxenicabo jema janin piti benahi canon cahen jano manati. Manahahnan, samaritano haibo jene bichi jahuiton, yocaquin:

—Hen nominon jene pishca hea bihxonhue, haibon —hahquin Jesusen.

⁹Jaatian:

—¿Jenquetsahaxon min mia judio hihxon bi hea samaritano haibo jene yocacain? —samaritano haibaan Jesus yocaquin. Judiobaan samaritanobo jistahihmahi copi haibaan jascajaquin.

¹⁰—Tsoan mia jene yocacai honanxon cah min mianbi jaa yocacan. Papan mia hinanai rihbi honanxon cah min yocacan. Jaatian ta mia jene mohini hinanquehanihqui —Jesusen jaquin.

¹¹—Mai poquin ta nemin qui, bebon. Hahan tsecati rihbi tah min yamahi.

¿Jahuen min jascapa jene mohini bihtihin? ¹²Noquen xeni Jacobonen ta nea noa xehanishqui. Jahuen baqueboyaxonbi jahuen yohinabaan rihbi nea jene xehaquin. Nea noa noque jaan hinannih que bi cahrn min jaa mentan hashoan coshi quin? —hahquin haibaan. ¹³Jaatian Jesusen sca:

—Nea jene hahcaibo ta hahquirihbi nomicatsihnoxihquiqui. ¹⁴Hean jene hinanah xehahax ta jahuentianbi jiricatsihyamascatihiqui. Jaa chicho quehax ta hen hinanai jene mohini jahuentianbi taraxaxma jabascatihiqui —haibo jaquin.

¹⁵—Jaa jene hea hinanhue, bebon, jiricatsihyamascaax hen neno jene bichi

jori joriyamascanon —haibaan Jesus jaquin. ¹⁶Jesusen sca:

—Miin bene quenatanhue, joribinoxon —jaa haibo jaquin. ¹⁷Jascahah:

—Heen bene ta yamahihqui —hahquin haibaan.

—Yohiquin sirija tah min jai, miin bene yamahi. ¹⁸Pichca miin bene janish bi cah min rahma huetsa betan hihrihbihi, miin benema rihbi. Hihcoin tah min jai —hahquin Jesusen.

¹⁹—Papan joi yohinica mia quin hen ta hen honanscai, bebon. ²⁰Nea machinxon ta noquen xenibaan betihihpaquexon Papahon shinanpahonishqui, Jerusalem janinxon non Papahon shinanti jai man maton jai bi —hihqui haibo. ²¹Jesusen sca:

—Hen mia yohihah nincacoinhue, haibon. Papahon shinanaibaana ta nea mahchinxonma bi Jerusalem janinxonma rihbi noquen Papahon man shinaryaxihqui. ²²Man honanyamahi naman tah man betihihpaquetai, Papahon shinancatsihqui. Non honanai naman betihihpaquexon tah non noquen shinanai. Jihuemanicah ta judio xohta qui. ²³Hahan Papahon shinanti nete jahuex bi ta nocoscaciqui, Papa qui betihihpaquexon shinancoinaibaana jahuen yoshin siriyaxonbi Papahon shinanbiresnon, hahan shinancoinquin. Jascapa shinanaibohon ta noquen Papa queenihqui. ²⁴Noquen Papa ta yoshin qui. Jahan shinanai noquebo ta jahuen yoshinyaxonbi shinancointi jaiqui —haibo Jesusen jaquin.

²⁵—Papa Diosen caisai joni, Cristo hahcaibo, joyaxihqui ta hen honanai. Joxon ta jatihibi joi noque yohiyaxihquiqui —hihqui haibo.

²⁶—Hea tah hen jaa qui, mia yohihi joni —hahquin Jesusen.

²⁷Jasca jan jaiya bi jahuen haxenicabo nocoti. Haibo betan yohuanaiton

merahax rahtecani. Rahtexon bi ¿Jahuejahi min hahbe yohuanahquin, jahua yohuan min jain, hahbetan? Jesus yocacatsihquin bi yocayamacanquin. ²⁸Jaatian jahuen poo tsahonbahini jema janin haibo cahi cahi. Cahinocoxon jonibo yohiquin:

²⁹—Jatihibi hean janíbo hea yohihi joni jistannahue. ¿Jaa Cristoma hin? —jato jaquin. ³⁰Jaatian jema janinhax cainax Jesus jisi bocani. ³¹Jasca sca jaiboya:

—Pihue, maestron —jahuen haxenicabaana Jesus jaquin. ³²Pihue jaibaana bi:

—Man honanyamahi piti ta hea jai —Jesusen jaquin. ³³Jasca jan jaiya jahuen haxenicabo jaabo rahsibi yohuani:

—¿Tsoan cahra piti bexonaxquin? —hihcane yohuani. ³⁴Jascahibo bi:

—Hea yononi queenai quescaxaxonti ta heen piti qui. Jahuen tee queyoxonti rihbi ta heen piti qui. ³⁵¿Chosco hoxne hihquish pari ta banabo tsinquiti siri sca jatihiqui hih man jayamahin? Man jascarai bi ta hen mato yohihi. Huai chian bana johuescai jisnahue. Tsinquiti siri sca ta jaiqui hah ta hen mato jai.

³⁶Cananhahnan ta tsinquinicaton jascabi jihuetai bimi tsinquihiqui. Bananica betan tsinquinica jenimascanon ta jaton tsinquitibo queyoyamanox manatihqui.

³⁷Huetsan tsinquinixonyaxahnon ta huetsan banahihqui hih ta jacaniqui. Hihcoin.

³⁸Man bananixonma bi tsinquitannon tah hen mato yononihqui. Caibaana hahni tee tah man tsinquiti —jato Jesusen jaquin.

³⁹Jaa jema janinha samaritanobaana ta hichaxon Jesus nincacoinnishqui. Jatihibi hean janíbo ta hea yohihaxqui hahquin haibaana jato yohicoina copí nincacoincanquin. ⁴⁰Jesus qui caxon yocaquin:

—Noque qui banehue. Cayama sca jahue —hahcanquin. Jascahahbo jato

betan rabe neten baneti. ⁴¹Jaanbi jato yohihiya nincacoincanquin hashoan tsamaxon sca. ⁴²Nincacoinxon haibo yohicanquin:

—Mian noque yohihah nincacoinpixon bi tah non jaa yohuanai noquenbi nincaxon non hashoan sca nincacoinscas. Jaa coin ta nai nequebihabo jihuemanicah qui, honancoin sca tah non jai —hahcanquin.

Hapon baque Jesusen rohajahi

⁴³Rabe neten jato betan banetax janohax Galilea main sca cahi caresscai.

⁴⁴Caquin sca ta jato yohinishqui:

—Jahuen main jihuetai bi ta jahuen caibaan Papan joi yohinica nincacatsihyamahihqui —hahquin.

⁴⁵Jascahi bi jatihibi jan Jerusalem janinha fiesta janinxon hahcai jistanipixon Galilea main jihuetaitaabaan Johue hahquin jaton main nocotaiton.

⁴⁶Janoxon jan jato jene hompajaxonni jema janin nocorihibi, Caná janeya jema, Galilea main. Capernaum jema janin cahen huesti tinintin baque hisini jai. ⁴⁷Judea mai mehax Galilea mai janin Jesus joresscai chanihah jaa yocaqui tininti jahui.

—Heen baque hea rahonxonni cahue. Hihcatsih sca ta jaiqui —hahquin.

⁴⁸—Hahan honanti jisyamaxon tah man nincacoinyamahi, hahqui rahetetibo rihbi jisyamaxon —tininti Jesusen jaquin.

⁴⁹Jan jascarai bi:

—Jani heen baque mahuanon carihue, hihbon —hahquin tinintin.

⁵⁰—Careshue. Miin baque ta jihuetihiqui —tininti Jesusen jaquin. Min yohihi quescai ta jacointihiqui hihquish tininti cahi caresscai. ⁵¹Cahipish cabahinahi bi jahuen jonibaan behchibenaquin.

—Miin baque ta rohscaipishqui —hihcani. ⁵²Jascaraiton jato yocaquin:

—¿Jahuerahnon bari racataiya jahuen yona tantihipishquin?

—Bahquish bari hihpaquescaiya ta yona tantihipishqui —hihcani. ⁵³Jano bari racatai bi Miin baque ta jihuetihiqui Jesusen jaipi jahuen papan honanscaquin. Jaatian sca jahuen xobo janinhahbo betan jatihixonbi Jesus nincacoinscasquin.

⁵⁴Jaa ta Judea mai mehax Galilea janin joribixon sca jahuen rabe sca jahuen hahan honanti Jesusen jato hahxonnishqui.

Yora honanyamajaquetai Jesusen rohajahi

5 ¹Jaa pecaho judiobaan fiesta jaiya Jerusalem janin Jesus caribihi.

²Jerusalem janin ta jema xehpoti jaiqui, carnero janeya xehpoti. Jema xehpoti hochoma cahen noa pishca racatah Betesda hahcaibo, judiobaan join. Jaa hian quexa ta pichca xobo tsahotihqui. ³Jaa xoboho cahen hicha hisinaibo racati, benchebo, tobi pishcabo, yora honanyamajaquetaibo. Noa pishca bahinon jaabo manati. ⁴Jaa noa janin roqui Papan yonoti paquepahonish. Paquexon qui jene bahimaquin. Bahihiya qui jenenencanya paquemenohi joni rohahi siripi. Jahuen hisin jatihibi rohacahini.

⁵Jano cahen huesti joni racati, treinta y ocho bari jascabi hisini. ⁶Racataiton jisxon hicha bari sca hisinai honanscaxon:

—¿Min rohacatsihyamahin? —hahquin Jesusen.

⁷—Jene bahihiya hea jenenencanya potanica ta yama qui, hihbon. Hea cahiya bi huetsa pari hihquihui —hihqui hisinai.

⁸—Huenihue. Huenixon miin cacajati bichish caresscatanhue —Jesusen jaquin.

⁹Jaatianbi rohacahinxon jahuen cacajati bichish caresscai. Jaton tantiti neten ta Jesusen jascajanishqui. ¹⁰Jaa copi ta jan rohajahi joni judiobaan yohinishqui:

—Rahma ta tantiti nete qui. Tantiti neten tah min miin cacajati botimahi —hahcanquin. ¹¹Jascahahbo bi:

—Miin cacajati bichish caresscatanhue hah ta hea rohajahi jonin jaaxqui —jato jaquin.

¹²—¿Jahua joni jaa quin, mia Miin cacajati bichish jaya catanhue hahcai? —hahcanquin. ¹³Yocacahbo bi Jesusen jane honanyamaquin, jano jonibo hicha nichiton Jesus rebesohtai copi. ¹⁴Jaa pecaho Papan xobohoxon jaa merarihbixon:

—Jise. Mia tah min siriscaí. Hohchayamascahue hashoan tiromamís —Jesusen jaquin. ¹⁵Jaatian caresscaxon judiobo yohiquin:

—Hea rohajahi joni ta Jesus qui —hahquin. ¹⁶Tantiti neten jan rohajahi copi judiobo Jesus qui rainyamahiton jaan jato joi bichinquin:

¹⁷—Heen papa ta rahma caman teetihqui. Hea rihbi ta hen teetai —Jesusen jato jaquin. ¹⁸Jascajaha hashoan sca Jesus rehtecatsihquibohi. Jan tantiti neten tantiyamahi copi rehtecatsihquibo. Papa Dios betan jasca rabe hihquish, Papa Dios ta heen papa qui jan jaiton.

Papan yohihah jahuen baquen haxemahi

¹⁹Jesusen jato yohirihbiquin:

—Yohicoín ta hen mato jai: Papan baquexon bi tah hen hehmebi jahuejati hahtipahyamahi. Heen papan hahcai jisxon pari tah hen hahcai, jatihibi heen papan hahcai quescabijaquin hean rihbi hahquin. ²⁰Hea jahuen baquehon shinanxon ta heen papan jatihibi jan hahcai rihbi hea jahuen baque jismahihqui. Jahuen coshiyaxon hen hahcai bi ta nea mentan hashoan coshin hen hahcai rihbi hen mato jismayahihqui, man rahtenon. ²¹Mahuanihbo huenixon heen papan jihuemahi quescajaribiquin tah hen jahuen baque hihxon hea hen queenaibo hean jihuemahi. ²²Tsoabi casticanxonma ta Papan hea yonohihqui

hean sca jatihibi jointi honanxon casticanyahnon. ²³Papa Dios Nete Hihbohi man honanai quescajaribiquin man jahuen baque Nete Hihbohi man jatihixonbi honannon ta jascajahiqui. Jahuen baque ta nete hihboma qui hihquibo ta Jaa raanni jahuen papa rihbi ta nete hihboma qui hihnicahbo qui.

²⁴Yohicoín tah hen mato jai: heen joi nincaxon bi hea raanni heen papa rihbi nincacoinai joni ta queyoyamanox manatihqui. Jaa casticanxonma ta Papan mahnescaiqui, mahuataibo janinhax jihuetaibo qui mahnenon. ²⁵Yohicoín ta hen mato jaribihi: mahuanihbaan ta Papan baquen yohihi nincascaiqui, nincacaibo jihuescanon. ²⁶Jahuen papa teehihmanicahi quescarihbibi tah hen hea jahuen baque jaa xohtahi, Mia rihbi jato teehihmanicahue, Papan hea janí. ²⁷Mia tah min noquebaque qui. Mian sca jato casticanhue hah ta heen papan janishqui. ²⁸Hen mato yohihah bi rahteyamanahue. Hean queenah ta tsahon janinhahbaan jatihixonbi nincayahihquiqui. ²⁹Sirijanibo ta cainax huenicahintihiqui, jascabi sca queyoyamanox manati jihuenoxon. Tiromajanibo rihbi ta cainax huenitihiqui, jascabijaquin casticanahbo janoxon.

Hahan Jesus honanti

³⁰Hehmebi tah hen jahuejati hahtipahyamahi. Papa nincaxon res tah hen jato casticantihi. Jaa copi tah hen pontejaquin shinanxon casticanyahihqui. Jaan hea yononixon shinanai quescajaquin tah hen jascajatihi. Heabi hen queenajah ta hen jayamahi. ³¹Hehqui heabi yohuanax cahen heen yohuan jahuabi hihiyamahan. ³²Hea jahua quin honanahbo ta huetsa yohuancoinihqui. Hea yohihi jan hihcoini yohuanai tah hen honanai.

³³Honancatsihquin man Juan qui raanah ta hihcoini jaa yohuancoinnishqui.

³⁴Jonibo res yohuanai joi ta hean nincayamahi. Papan mato teehihmanon hihxon res ta hen mato yohihi. ³⁵Johue quetejaha xabatai janin quescari tah man Juan qui caniqui, jahuen xaba chian sca basima jenimanoxon quescapi. ³⁶Heen papan ta hea teebo yohinishqui hean queyoxonnon. Jaa ta hen hahcai, hea papan raanni man honancoinnon hihxon. Hean hahcaibo ta hea yohihi joi quescapi, hahan hea honanti. Juaman yohini nincaxon hahan hea honanti bi hean hahcai jixxon hashoan sirijaquin honanti.

³⁷Hea raanni heen papan ta hehqui yohicoinihqui. Jan yohuanai tah man jahuentianbi nincayamanihqui. Beron rihbi tah man jaa jisyamaniqui jahuentianbi. ³⁸Jaan raanni joni man nincacoinyamahiya ta maton jointi janin Papan joi yamahihqui. ³⁹Papan huishani joi jisquin sirijanahue. Hea yohihi joi ta jaa qui, hahan hea honanti bi tah man hahan mahuataxma jihueti man shinanai. ⁴⁰Hean mato teehihmanon hehqui jotihi bi tah man jocatsiyamahi.

⁴¹Jonibaan res hea Yotiho coshi mia quin hahti tah hen queenyamahi. ⁴²Mato tah hen honanai. Noquen Papahon tah man queenyamahi. ⁴³Heen papan hea raanah hen jahui bi tah man hea Johue hahyamahi. Jaabaanbi shinanax jahuiibo tah man Johue hahtihi.

⁴⁴¿Jenquetsahaxon man mato qui siripi yohuanaibo benaxon man noquen Papan joi nincacointihin? Papa huesti noquen Dios hihqui bi tah man jaa siripi mato qui yohuanti man queenyamahi. ⁴⁵Heanbi noquen Papa maton hochha yohipaquexaxihqui shinanyamanahue. Mato cahenica ta Moisesnin huisha qui, hahan jihueti man shinanai que bi.

⁴⁶Moisesnin huishani joi nincacoinxon cah man hea rihbi nincaquehanai.

Hehqui ta jaan huishanishqui.

⁴⁷¿Jenquetsahaxon man heen joi nincacointihin, Moisesnin huisha rihbi nincacoinxonma bi? —jato Jesusen jaquin.

Cinco mil Jesusen pimahi

(Mt. 14.13-21; Mr. 6.30-44; Lc. 9.10-17)

6 ¹Jaa pecaho sca ta Galilea mai meha hian pohquejaqueti Jesus canishqui. Tiberias cahen jaa hiaman jane huetsa.

²Papan coshiyaxon hisinaibo Jesusen rohajahi jixxon hichaxon Jesus chibancanquin. ³Mahchi manichish jano jahuen haxenicabo betan Jesus tsahopaqueti. ⁴Judiobaan pascua fiesta nea pishca sca jai. ⁵Jari jixxon hihti caibo hahqui jahui meraxon Felipe yocaquin: —¿Jahuerahnon non piti marotihin jaabaan pinon?

⁶Felipe tananoxon ta jascajanishqui, jaanbi piti caijanaxon bi yocaquin. ⁷Jaatian:

—Doscientos libras non jai bi ta hahan paan marohah jato jatihixonbi piti senentimahiqui, hexti pishca cohren huesti hinanah bi —Jesus Felipepin jaquin. ⁸Huetsa rihbi jahuen haxenica jahui, Andres, Simon Pedron huetsa.

⁹—Neno ta beronan jaiqui. ¿Pichca cebada paanya rabe tsatsa rihbi jan jai bi hen neatih noquebo janon bi jaa jahuejatiquin? —Jesus jaquin Andresnin.

¹⁰—Jato tsahopaquemanahue —Jesusen jaquin. Hani pasto jano jaiya, jano tsahopaquēcani. Bebobo rahsi toponah ta cinco mil joni janishqui.

¹¹Jaatian jaa paan pishca bihxon Papa yocaxon tehaxon tsahotaibo Jesusen hinanpaquequin. Tsatsa sca jascajaribiquin jaabo queenai tihi.

¹²Yaniscaiboya:

—Texejaha teque romishin tsinquitannahue, jahuabi yohyocohyamanon —jahuen haxenicabo Jesusen jaquin.

¹³Jascajaha tsiniquicanquin. Pichca cebada paan pihibaan texejahi tequebo tsiniquixon, doce tasa bohacsacanquin. ¹⁴Jascajaquin Papan coshiyaxon jan hahcai jisish:

—Nea coin ta Papan joi yohinica main joyaxihqui yohicanpahonishqui —hihqui pihitshahotaibo. ¹⁵Jaton quiquin hapo sca hihnon jaa bichi jocatsihquiibaan bi honanscaax mahchi janin jaa huesti Jesus caribihi.

Jesus jene benichi

(Mt. 14.22-27; Mr. 6.45-52)

¹⁶Bepiscaiya jaton nonti janin jahuen haxenicabo nihpaqueti cahi. ¹⁷⁻¹⁸Nontin nanetax Capernaum quiri pohquejahqueti cahi. Yamescaiya jato qui Jesus joriyamahi bi nihuen coshin behchonjaquin. ¹⁹Basi huina huinaxon yame jisibaan bi hahchon hian benichi Jesus jahui, nonti hochoma sca. Hian benichai merahax rahtecani.

²⁰Rahtetaibaan bi:

—Hea ta hen qui, raqueyamanahue —hihqui Jesus. ²¹Jaatian nontin nanemacatsihquibo bi nococahinscacani, jano jan cahi hoque quexa.

Jesus benahibo

²²Xaba paquescaiya cahen hoque quexa banetipibaan benahah bi Jesus yamascai. Jahuen haxenicabo betan ta Jesus naneyamahipishqui. Jaabo rahsibi nontin cahi tah non jisipiqui. Jaa huesti nonti res ta jaipishqui, huesta yamahi. ¿Jahuenrahnnon Jesus चाहिपिश्क्वि? hihxon benahahbo bi yamahi. ²³Janoxon jan Papa yocaxon jato paan pimahipi hochoma sca Tiberias janinhax jahui nontibo nocoti. ²⁴Jahuen haxenicaboyabi Jesus xahbanjahax, hahan behibo nontin sca nanetax, Capernaum janin jahui becani, Jesus benahi.

Jesus noquen hahan jihueti piti

²⁵Pohquequihrani joxon Jesus meraxon yocacanquin:

—¿Jahuentian min neno jahuequin, maestron? —hahcanquin.

²⁶—Yohicoïn ta hen mato jai: Papan coshiyaxon hen mato hahxonai jisipixon bi tah man jaa copima hea benahi. Paan pihit yanitipixon copi tah man hea benahi. ²⁷Queyonica piti copi teeyamanahue.

Jahuentianbi queyoyamanox manatai piti copi teenahue. Noquebaque hihxon hen hinanyaxihqui piti ta jascapah qui. Hea jascapa hinannica man honannon hihxon ta jahuen shinanyaxon hen hahnon Papan hea hinanishqui —Jesusen jato jaquin.

²⁸Jan jascahiya:

—¿Jahueja non jatihin, Papan tee hahnoxon? —hahcanquin.

²⁹—Papan raanai joni nincacointi ta jaa tee qui —Jesusen jato jaquin.

³⁰—¿Jahua hahan honanti min hahcain, jisxon non nincacoinnon hihxon? ¿Jahueja min jain, Papan shinanyaxon? ³¹Cahchihoxon ta noquen xenibaan maná piti pipahonishqui. Jaa yohihi ta Naihoh queha piti ta jato hinannishqui, pihabo, hih Papan huisha janin jaiqui —Jesus jacanquin.

³²—Mato tah hen yohicoïnai: naihoh queha piti ta Moisesnin mato hinanyamanishqui. Heen papan caya ta mato naihoh queha piti coin hinanishqui. ³³Jaan hinanai piti ta naihoh quehax botopaquetihqui, jaa pihax jihuetahbo —Jesusen jato jaquin.

³⁴—Jascapa piti noque hinanquin jeneyamaxahnue, Hihbon —hahcanquin.

³⁵—Hea ta hen hahan jihueti piti qui. Hehqui jahuibo ta picatsiyamascatihiqui. Hea nincacoinaibo ta jiricatsiyamascatihiqui, jahuentianbi. ³⁶Hea jisxon bi tah man nincacoinyamahi hah cah hen mato jai. ³⁷Heen papan hea hinanai tihibi ta hehqui joti qui. Hehqui jahuibo tah hen potatimahí, ni huestibi. ³⁸Hea queenai

quescajahi tah hen joyamaniqui. Hea raanni queenajahi tah hen naihoh quehax botopaquetax joníqui. ³⁹Ni huestibi manomaxonma tah hen jan hea hinanai jatihibi hean hueniyaxihqui nete queyoscanon. Hean jascajati ta hea raanni queenihqui. ⁴⁰Jahuen baque jisxon jaa nincacoinaibo queyoyamanox manati ta heen papa queenihqui. Nete queyoscanon tah hen jato hueniyaxihqui —jato jaquin.

⁴¹Jan jascahiya judiobo hahqui renren renreni. Naihoh quehax botopaqueni piti ta hea qui jan jaiya hahqui rainyamacani.

⁴²—¿Nea Jesus janeya joni Josepan baquema hin? ¿Jahuen papa, jahuen mama non honanyamahin? ¿Jenquetsahaquin sca Hea tah hen naihoh quehax paqueni hah noque jaiquin? —hihcani.

⁴³Jaatian:

—Mato rahsibi yohuani renren renrenyamanahue. ⁴⁴Heen Papan Johue hahca ta hehqui jahuiho jahuiqui. Jan Johue hahyamaha cahen joti hahtipahyamahan. Hehqui jahuiho tah hen hueniyaxihqui, nete queyoscanon. ⁴⁵Papan honanmahibo rahsi ta jatihiqui; jascajaquin ta Papan joi yohinicabaan huishanishqui. Heen papa yohuanai nincaxon honanaibo jatihibi ta hehqui jotihiqui.

⁴⁶Tsoanbi noquen Papa jisyamani que bi ta Papa janinha huestichin jaa jisnicah qui. ⁴⁷Hihcoinja ta hen mato jai: nincacoinaibo ta jahuentianbi queyoyamanox manatihqui. ⁴⁸Hahan jihueti piti ta hea qui. ⁴⁹Cahchihoxon maná piti pihax bi ta maton xenibo mahuanishqui. ⁵⁰Naihoh queha piti pihax tah man mahuayamascatihi. Jascapa piti ta naihoh quehax botopaquetihqui. ⁵¹Naihoh quehax botopaqueni piti mohitahpa ta hea qui. Jascapa piti pihax tah man queyoyamanox manascatihi.

Hean hinanai piti ta heen yora qui. Mai mehabo jihueyaxahnon tah hen jato hinanai —jato jaquin.

⁵²—¿Jenquetsahaxon noque jahuen yora hinantihiquin, non pinon? —hihquish jaabo rahsibi judiobo join bahchinnanscai. ⁵³Join rehtenanaiboya Jesusen jato yohiquin:

—Yohicoín tah hen mato jai.

Noquebaquen yora piyamaxon jahuen jimi rihbi xehayamahax tah man jihueyamahi. ⁵⁴Heen yora pixon heen jimi rihbi xehahi noque ta queyoyamanox manatihqui. Jaabi rihbi tah hen hueniyaxihqui, nete queyoscanon. ⁵⁵Heen yora ta piti coin qui. Heen jimi rihbi ta xehati coin qui. ⁵⁶Heen yora pixon heen jimi rihbi xehahi tah man heen hahberabetibo qui, hea rihbi maton hahberabeti. ⁵⁷Heen papa ta jihuetihqui. Hea ta raannishqui. Hea jaa copi jihuetai quescarihibi ta hea pihibo jihuetihiqui, hea copi. ⁵⁸Jascapah ta naihoh quehax botopaquetai piti qui. Noquen xenibaan piti pihax bi mahuanih queycayamahi. Nea piti pihax queyoyamanox manati, jascabi sca jihuenox manati, —jato jaquin. ⁵⁹Capernaum janin haho tsinquitit xobohoxon ta Jesusen jato jascajaquin yohinishqui honanmaquin.

Queyoyamanox manati

⁶⁰Jan yohuanai nincaxon:

—Honantima tah qui, jan yohuanai. ¿Tsoan nincatihiquin? —hihqui hicha jahuen haxenicabo. ⁶¹Jahuen haxenicabo hahqui renren renrenai jahuen jointinin honanxon jato yocaquin:

—¿Hen yohuanai nincacax man rahtetain? ⁶²¿Janohax hen joníton hen hahquirihbi hinahihnatai jisish cahran man hihti rahtetimahin? ⁶³Dios Yoshiman ta mato jihuematihiqui. Maton yora betan res tah man jahua bihtimahi.

Hen mato yohihi joi ta yoshinyahpa qui, hahan jihuetai. ⁶⁴Hahan jihuetai joi hen mato yohihah bi tah man caibaan nincacoinyamahi —jato jaquin. Jato jismenoxon ta tsoabo nincayosmabohin Jesusen honannishqui. Paranxon jaa bihmayaxihqui joni rihbi honanquin.

⁶⁵—Jaa copi ta hen mato jascajahipiqui. Papan shinanyamahiya ta tsoabi hehqui jotimahiqui —hahquin.

⁶⁶Jan jascaraiya ta hicha jahuen haxenicabaan jaa potabahinnishqui. Haxehi hahbetan nihyamascacani.

⁶⁷—¿Maton rihbi man hea potabahincatsihquin? —jahuen doce haxenicabo Jesusen yocaquin.

⁶⁸—¿Tsohqui non catihin nan, Hihbon? Mian tah min noque hahan queyoyamati joi nincamahi. ⁶⁹Mia Papan raanai jahuen caisti joni tah non mia honancoinai. Shinanquin sirijaquin tah non honanscai —hahquin Simoman.

⁷⁰—¿Mato doce hen caisyamanihquin? Mato quiha huesti ta tiroma yoshin qui —Jesusen jato jaquin. ⁷¹Jan yohihi ta Judas qui, Simon Iscariotenin baque. Jahuen doce quiha hihxon bi Jesus bihmatai shinanai joni.

Jahuen huetsabaan nincacoinyamahi

7 ¹Jascahipish Galilea mai janin res Jesus nichí. Judea main nihcatsihyamascai, judiobaan rehtecatsihquiya. ²⁻³Judiobaan tapasohoxon fiestajati nete nea pishcascaya, jahuen huetsabaan Jesus yohiquin:

—Nenohax Judea main carestanhue, janoxon min hahcaibo miin haxenicabaan rihbi jisnon. ⁴Sirijaquin jisbo hihxon ta jonexon tsoanbi jahuejayamahiqui. Papan coshiyaxon hahan honanti hahcatsihquin janibixon hahhue, jatihixonbi jisquin sirijahabo —hahcanquin. ⁵Nincacoinyamaxon copi

ta jahuen huetsabaanbi jascajanishqui.

⁶Jesusen sca jato yohiquin:

—Caritima pari tah hen jai. Mato caya botannahue. Jahua copi hea manatima tah man jai. ⁷Mato jistahihmajati ta mai mehabaan hahtipahyamahiqui. Jaabaan tiromajahi hean hihcoinjaquin yohihiya ta hea jistahihmajacanihqui. ⁸Fiesta janin botannahue, mato. Caritima ta hea jai. Queenax ta hea catihi.

⁹Jato jascajaquin yohihax, Galilea main banetahbi.

Tapasax jihuetahbabibo janin Jesus cahi

¹⁰Jahuen huetsabo fiesta janin cahipi sca jaa rihbi cahi, caibaan jisnonma sca, janibima. ¹¹Jonetax cahi bi fiesta janinxon judiobaan jaa benaquin:

—¿Jahuen jaa quin? —hahcanquin.

¹²Hihti caibo jaya baxex baxexi.

—Siri joni tah qui —hihqui caibo.

—Sirima ta qui. Jonibo ta paranihqui —hihqui caibo rihbi. ¹³Judiobo qui raquetax tsoabi coshin jaya yohuanyamahi, honahaxbi yohuancani.

¹⁴Fiesta naexbi sca Papan xoboho mapexon Papan joi Jesusen haxemaquin.

¹⁵Jan jascahiya rahtetax judiobo yohuani: —¿Jenquetsahaxon neatohon huisha joi honanishquin tsoanbi quirica honanmanima bi? —hihcani.

¹⁶Jascahiton Jesusen yohiquin:

—Hen jato honanmahi ta heen joima qui. Hea yononihton joi tah qui. ¹⁷Papan shinanajati hahcatsihquiibaan ta honantihiqui. ¿Papan shinanaiya honanma hen jain? ¿Heanbi shinanxon honanma hen jain? Jaabaan ta hen yohuanai honantihiqui. ¹⁸Coshi joni hihqui shinanahbo hihquish ta jaabaanbi shinanax yohuanaibo jaiqui. Hea raanai heen Papa coshi hihqui honanahbo hihquish tah hen hea yohuanai. Jascapa yohuannica ta hihcaini yohuannica qui. Jahuabi tiroma yohuanyamahi. ¹⁹¿Maton

nincati joi Moisesnin hinanyamanishquin? Ni huestichinbi tah man jaa joi nincayamahi, jaan hinanni que bi. ¿Hean mato jahua hahca man hea rehtecatsihquin? —Jesusen jato jaquin.

²⁰—Mia rah ta yoshiman hihbojahiqui. ¿Tsoan mia rehtecatsihquiquin? —hihcani. ²¹Jesusen jato yohirihbiquin: —Hen hahcai huesti jisish tah man jatihibi rahtetai. ²²Jaanbi shinanxonma bi noquen xenibaan pari yohihah ta Moisesnin mato honantiyahpati yohinishqui. Tantiti netenbi tah man baquexo honantijahi. ²³Moisesnin yohini quescajacatsihquin tantiti netenbi joni huetsa honantijanicaboxon ¿jahua copi sca man tantiti neten hean huetsa joni rohajahiya man hehqui rainyamahin? ²⁴Beron jisxon res huetsa jonin shinan honanti shinanyamanahue. Shinanquin sirijaxon pari joni huetsa honannahue —jato jaquin.

Nai janinhax Jesus joni

²⁵Jasca jan jaiya caibo Jerusalem janinhahbo yohuanscai: —¿Neama hin, rehtecatsihquibo joni? ²⁶Jistan. Janibi nichish yohuanai bi ta jahua hihiyacanihqui. ¿Cristo hihqui noquen cacannicabaan honancoinscaiquin? ²⁷Janobihax nea joni jahui tah non honanai. Cristo joni jahuiya roqui tsoanbi jahuerahnohax jaa jahuiquin hihxon honanyamayaxihcanihqui —hihcani.

²⁸Jaa copi cahen Papan xobohoxon jato haxemahi sca Jesus coshin yohuani:

—¿Hea man honanain nan? Janobihax hea joni man honanrihbibi nan? Hehme mehax ta hen joyamaniqui. Hihcoinnicahton ta hea raanishqui. Jaa tah man honanyamahi. ²⁹Hean tah hen jaa honanai. Jaan hea raanah ta hen jaa janinhax joniqui —hahquin Jesusen.

³⁰Jasca jan jaiya xecotancatsihxon bi jaa

bihxon rehteti siriyamaparihiya tsoanbi meheyamaquin. ³¹Rehteti shinan caibaan jai bi hicha noquebaan Jesus nincacoinquin.

—Neatohon ta hahan honanti hahquiqui, hicha. ¿Cristo joxon, neatohon hahcai quescajaxon bi hashoan hicha rihbi hahan honanti hahtihiquin? —hahcanquin

Fariseobaan Jesus bihcatsihqui

³²Jascari baxexaibaan bi fariseobaan nincaquin. Nincaxon, sacerdote hapobo betan fariseobaan sca jaton porisiabo raanquin, Jesus bihtannahue hahxon.

³³Bihcatsihscabo copi cahen jato yohiquin:

—Basima tahni sca tah hen mato betan hihtihi. Hea raanni janin sca hea cati ta hochoma sca qui. ³⁴Hea benaxon bi tah man hea meratimahi. Hea cahi janin tah man cati hahtipahyamatihi —jato jaquin Jesusen. ³⁵Jaabo rahsibi sca judiobo yohuani:

—¿Jahuenbi cacatsihquiquin, non jaa merayamascanon? ¿Nahuabo qui canibo janin cacatsihquiquin, nahuabo sca honanmahi? ³⁶¿Benaxon bi tah man hea meratimahi jan hihqui bi jahua hihcatsihquiquin? Hea cahi janin tah man cati hahtipahyamahi. ¿Jan jascari yohuani hen jahua hihcatsihquiquin? —hihcani.

Jene mohini bahihi

³⁷Hahan fiesta queyotai neten, jaton hani netenbi, nichish Jesus coshin yohuani:

—Jiricatsihquish hehqui benahue, xehahi. ³⁸Hea nincacoinai joni janinhax ta jene mohini huean bahihihcamaxihquiqui, jahuen jointi janinhaxbi, Papan huisha joi jai quesari —hahquin. ³⁹Jan jene yohihi ta Dios Yoshin qui, nincacoinaibaan bihiyahiqui Dios Yoshin. Jesus

huenihihniriyamaxon ta jahuen yoshin Papan hinanyamaparinishqui.

Join bahchinanaibo

⁴⁰Jan jascari yohuanai nincacax tsinquiijaquetaibo yohuanrihbihi: —Nea coin ta Papan joi yohinica qui —hihcani.

⁴¹—Noquen hapo hihnon Papan caisai joni tah qui —hihqui caibo rihbi.

—¿Galilea mai janinhax Papan caisai joni jotihiquin? ⁴²David xohtahax ta David jihuepahoni janinhax Papan caisai joni picotihiqui, Belen jema janinhaxbi. ¿Jascayamahin, Papan huisha joi janin? —hahcanquin caibaan rihbi. ⁴³Jascapa mesco shinanyahpabohax join bahchinnansacani. ⁴⁴Caibaan Jesus xecotancatsihquin bi tsoanbi meheyamaquin.

Nincayamahi hapobo

⁴⁵Jano sacerdote hapobo betan fariseobo manatai janin jaton porisiabo nocorihbihiton yocacanquin:

—¿Jenquetsahpa hin man hihueyamahahquin? —hahcanquin.

⁴⁶—Tsoabi ta jan yohuanai quesca jayamanishqui, jahuentianbi —hihqui jaton porisiabo sca.

⁴⁷—¿Mato rihbi jaan paran paranaxquin? ⁴⁸Maton hapobaan ni huestichin jaa nincayamahi ¿man jisyamahin? Fariseobaan rihbi ta jaa nincayamahihqui. ⁴⁹Nea tsamatai rahsi ta yohitimabo qui, Papan huisha joi honanyamahibo —jato jacanquin fariseobaan.

⁵⁰Nicodemo janeya Jesus qui johuanni joni jato betan hihxon jato yocaquin:

⁵¹—¿Huetsa joni yohuanquihxonma bi, jan hahcai rihbi honanxonma bi non jaa casticantihin? ¿Papan huisha joi janin jascajati joi jaiquin? —jato jaquin Nicodemonen.

⁵²—¿Mia rihbi tsi ra min Galilea mai meha quin? Papan joi jisquin sirijaxon, Galilea mai janinhax Papan joi yohinica jotima honanhue —jacanquin.

Tsinihi haibo

⁵³Janohax picotax, jatihibi jaton xoboho bocani.

8 ¹Olivoyahpa mahchin sca Jesus cahi. ²Hihari sca Papan xoboho cahi. Jano sca roqui hahqui jatihibi joni tsinquitaiton tsahoxon jato yohi yohinish. ³Jan jato haxemahiya qui jaton haxemanicahbo betan sacerdote hapobaan qui huesti haibo hihuequin, joni huetsa betan hihqui qui meraxon. Jato tocan jaa nichinxon qui Jesus yocacanquin:

⁴—Joni huetsa betan hihqui bi tah non nea haibo merahahqui, maestron.

⁵Huishaxon ta Moisesnin yohinishqui, nescapa non macaman tsacaquin rehtenon. ¿Mian cahran? ¿Jahua min mian yohihin? —hah qui jacanquin.

⁶Jaton hapobo yohinoxon qui Jesus tanaquin jascajacanquin, hahqui yohuanti qui janon. Jasca jaabo jaiya qui cahcopaquexon qui jahuen metotinin mai huishaquin. ⁷Jascabi yocacahbo qui huenixon qui jato yohiquin:

—Hohchajomaxon mato janinha huestichin macaman tsacamenonon —hah qui jato jaquin. ⁸Cahcopaquerihbixon qui mai huisharihbiquin. ⁹Jan yohihi nincacax qui yosibobo rahsi pari cahi. Jaa pecaho qui huesti huestibo cahi, jaa xobo janinhax caini. Jesus patax haibo huesti qui banenon. ¹⁰Huenixon qui haibo Jesusen yocaquin:

—¿Jahuen bocanaxquin? ¿Mia tsoanbi casticancatsihyamahiquin? —hah qui jaquin.

¹¹—Tsoanbi hihbon —hihqui haibo.

—Hean rihbi ta hen mia casticanyamahi. Caresscatanhue.

Jahuentianbi hohchayamascahue —hah qui jaquin Jesusen.

Jesus noquen xaba hihbo

¹²Huetsa tian rihbi ta Jesusen jato yohinishqui:

—Jatihibi main ta hen hean jato xabajaxonai. Hea chibanaibo ta bahquish chian nihyamahiqui. Hahan jihueti xabapan sca ta mayaxihcanihqui. ¹³Jan jascajahiya:

—Mianbi shinanax tah min yohuanresai. Chanicoïn tah min jayamahi, noquen nincatima hih —fariseobaa sca hahquin. ¹⁴Jesusen sca jato pontequin:

—Jahuerahnohax jahuex jahuen sca hea catihin hen honanax yohuanai hen mato yohihi ta maton nincati qui, yohicoïnai joi. Heabi yohihi hen yohuanai bi tah man nincacointi jai. Janohax jahueh hea jahuerahnon cahin man tah man honanyamahi. ¹⁵Beron res jixson tah man joni huetsana jahuen shinan honanti shinanai. Jascajaquin shinanxon tah man casticannoxon Papan rahuibo yohiti shinanai. Hean ta hen tsoabi jascajaquin yohiyamahi. ¹⁶Yohixon tian tah hen hahcoïnquin yohitihi. Hea raanni heen papa betan tah hen jaton shinan honanai, hea huestichin yohixonma bi hahbetanbi yohixon.

¹⁷Maton nincati joi janin ta nescapa huisha jaiqui. Rabechin yohihah pari ta yohuan coin qui, nincati. ¹⁸Rabe tah non qui hah ca hen mato jai sen. Hea yohihi heabi hihqui bi ta hea raanni heen papan rihbi hea yohihihqui —jato jaquin Jesusen. ¹⁹Jaatian:

—¿Jahuen hin, miïn papa? —hahcanquin.

—Hea honanyamaxon tah man heen papa rihbi honanyamahi. Hea honanxon cah man heen papa rihbi honanan —jato jaquin. ²⁰Janoxon Papa Dios coriqui

hinanti chiquehoxon ta Jesusen jato jascajaquin yohinishqui, Papan xobohoxon honanmaxon. Jahuen mahuati hora nocorihyamahiya tsoanbi meheyamaquin.

Jano jaa cahi janin jaabo catimahi

²¹Jahuen Papa honanyamahibo copi jato hahquirihbi yohiquin:

—Hea tah hen cahi. Hea benahax bi tah man maton hohchayabi mahuatihi. Jano hea cahiton tah man catimahi —hahquin. ²²Nincaxon bi honanyamahax sca:

—¿Jano hea cahiton tah man catimahi hihquish bi hahri rehtécatsihquiquin? —hahcani judiobo.

²³—Mato tah man naman mehabo qui. Hea tah hen bochiquiha qui. Mato tah man nea xabapan meha qui. Hea tah hen nea xabapan mehama qui. ²⁴Jaa copi tah hen Maton hohchayabi tah man mahuatihi hah hen mato jaahqui. Hea hihqui shinanyamahax tah man maton hohchayabi mahuatihi —Jesusen jato jaquin. ²⁵Jan jascajahiya:

—¿Mia min jahua quin? —hahcanquin.

—Jaa yohi tah hen mato jai. ²⁶Mato qui yohiti ta hen hicha jai. Mato casticanti rihbi tah hen hicha jai. Man tiromahibo bi ta hea raanni hihcoïn yohuannica qui. Jan yohuanai nincaxon ta hen jaa joi rihbi main jihuetaibo yohihi —jato jaquin Jesusen. ²⁷Jahuen papa yohihi jan hihqui bi ta honanyamacannishqui.

²⁸Honanyamahiton Jesusen yohiquin:

—Hea noquebaque jihuïn hueonxon pari tah man hea hihqui honantihi. Hehmebi jahuejaxonma bi papan hea yohini joi rahsi yohi hen jai tah man honantihi. ²⁹Hea raanni noque ta hehbe hihquiqui. Jaa queenai quescajaquin hen jai copi ta hea jeneyamahihqui.

³⁰Jascajaquin jato yohihah hichaxon nincacoincanquin.

Papan baqueboya hina baquebo

³¹Nincacoin ta jai hihquibo judiobo sca Jesusen yohiquin:

—Heen joi jascabiyaquin nincacax tah man heen haxenicabo jacointihi.

³²Hihcoin hen jani quen tah man honantih. Jaa honanax tah man hinabomascatihi —Jesusen jato jaquin.

³³—Noque tah non Abrahamen baquebo qui. Tsoanbi ta noque hinajayamanishqui, jahuentianbi. ¿Jenquetsahpahn min noque Hinaboma sca tah man jatihi min noque jain? —Jesus jacaquin.

³⁴Jascaraiton jato yohirihbiquin:

—Yohicoi tah hen mato jai. Jatihibi hochchataibo ta hina qui, hochchapan hihbojahah. ³⁵Hina ta xoboho jascabihi jihue jihueyamahihqui. Xobo hihbaan baque res ta jano jihuenica qui, queyoyamanox mana jihueti. ³⁶Papan baquen mato hohcha sohuaxona tah man hihcoini hinabomascatihi. ³⁷Abrahamen baquebo man jai tah hen honanai. Jahuen baqueboxon bi tah man hea rehtecatsihqui, maton jointi janin heen joi hihquicasquimahiya. ³⁸Heen papan hea jismahi ta hen mato yohihi. Maton rihbi tah man maton papan yohihi quescabiyaquin hahcai —jato jaquin Jesusen.

³⁹—Noquen papa xeni ta Abraham qui —hahcanquin. Jesusen sca:

—Abrahamen baqueboxon tah man jahuen tee hahquehahnai. ⁴⁰Hea tah man rehtecatsihscail, Papan hea yohihi hen mato yohicoinah bi. Abrahamen ta jascajayamanishqui. ⁴¹Maton papan tee tah man hahcai —Jesusen jato jaquin.

—Noquen mama ta tsiniyamanishqui. Huesti res ta noquen papa qui, noquen papa Dios —hahcanquin. ⁴²Jesusen sca:

—Papa Dios maton papa hihquiya tah man hehon queenquehanai. Papa Dios janinhax jonish tah hen hea jahui.

Hehmebi tah hen joyamaniqui. Jaan ta hea raannishqui. ⁴³¿Jenquetsahpahn man hen mato yohihah bi man honanyamahin? Heen joi nincayosmaboxon tah man honanyamahi. ⁴⁴Tiroma yoshin ta maton papa qui. Jaa queenai hahti res tah man maton rihbi shinanai. Noquebo jamenohitian rehtemis hihnish ta rahma caman jascabi rehtemis qui, maton papa. Jaabiyahpa quesamisax, jascabihi quesahi. Quesa hihxon ta caibo sca quesamaribihiqui. Hihti quesa, maton papa. ⁴⁵Hihcoini yohuan hen jai copi tah man nincacoinyamahi. ⁴⁶¿Tsoan man hea heen hohcha yohithin?

¿Jenquetsahpahn man hea hihcoini yohuanai bi man hea nincacoinyamahin? ⁴⁷Papan baquebo ta jahuen joi nincanicabo qui. Jahuen baquemaboxon tah man nincayamahi —Jesusen jato jaquin.

Abraham jariyamahiya Cristo jihue hihboni

⁴⁸Jan jato jascajahiya:

—Mia tah min Samaria mai meha qui. Yoshiman ta mia hihbojahiqui. ¿Hihcoinja non mia jayamahin?

⁴⁹Jascahahbo jato Jesusen yohirihbiquin:

—Yoshiman ta hea hihbojayamahiqui. Heen papa qui tah hen siripi yohuanai. Mato tah man hehqui tiromahi yohuanai. ⁵⁰Hehqui siripi yohuanai benahi ta hen joyamahi. Jatihibi shinan honannica ta jaiqui. Jaan ta mato yohihihqui, hehqui siripi yohuanxon. ⁵¹Hihcoinja ta hen mato jai. Heen joi nincacai jonibo ta mahuayamanox manatihqui —jato Jesusen jaquin.

⁵²—Mia yoshiman hihbojahi tah non honanscai. Abraham ta mahuanihshqui. ¿Papan joi yohinicabo rihbi hihni que bi min jascarain, Heen joi nincacai noque ta mahuayamanox manatihqui, hihqui?

⁵³¿Mia min noquen papa yamanica

Abraham mentan hashoan coshi quin? Papan joi yohinicabo rihbi ta mahuanishqui. ¿Jahua hihqui shinan mian jain? —Jesus jacaquin. ⁵⁴Jato Jesusen yohiquin:

—Hehqui siripi yohuanaibo benaxon tah hen jahuabi bihtimahi. Heen papa ta hehqui siripi yohuanihqui, Jaa ta noquen Dios qui hih man jai que bi. ⁵⁵Jaa man honanyamahi bi tah hen hean honanai. Mato quescapa quesamis hihquish pari ta hen Jaa ta hen honanyamahi hen jatihi. Jaa ta hen honanai. Jahuen joi rihbi ta hen nincacoinai. ⁵⁶Hea neno joyaxihqui honanax ta maton papa yamanica Abraham jenimanishqui. Hea jahui jisish sca ta coin coinnishqui —jato Jesusen jaquin. ⁵⁷Jan jascaraiya:

—¿Cincuenta bari jariyamaxon bi min noquen xohta yamanica Abraham jisniquin? —judiobaan Jesus jaquin.

⁵⁸—Hihcoinja tah hen mato jai.

Abraham cainrihyamahi bi tah hen hea janíqui —jato jaquin. ⁵⁹Jan jascaraiya, tsacanoxon macan bichibaan bi jonetax Papan xobo janinhax Jesus cainscai.

Benche cainni joni Jesusen rohajahi

9 ¹Jano huinoxon benche joni jisquin, benche jahuen maman bihni.

²Jahuen haxenicabaan sca yocaquin:

—¿Tsoa tsi ra hohchanishquin, Maestron, benche hoa jahuen maman bihnon? ¿Jahuen papabo nan? ¿Jaabi nan? —hahcanquin.

³—Jan hohchani copima ta qui.

Jahuen papabo rihbi hohchani que ma bi tah qui. Papan coshiyaxon jaa rohajahi jisibo ta benche jahuen maman bihnishqui. ⁴Hea raanni heen papan teebo jahti ta noque jai, bari queya parihiya. Tsoabi teeti hahtipahyamascanon ta yametihiqui.

⁵Mai mehabo tocan jihuxon tah hen jato xabajaxonai.

⁶Jascajaxon mai qui toshbanhaxon huaho berojaxon benche betsamxon yohiquin:

⁷—Siloé janeya noaho benashitanhue —hahquin. Siloé ta raanah hihcatsihquiqui. Jascahah, cahax, benashitani joquin jisbenascaquin. ⁸Jan coriqui yocacahtai jispanionbaan sca yocaquin:

—¿Neama hin, yoca yocaqui tsahopahoni joni?

Jahuen habbe jihuenihbaan rihbi jascajaquin yocaquin.

⁹—Jaabi ta qui —hihqui caibo.

—Jaamahax bi ra ta jaa quescapih qui —hihqui caibo rihbi.

—Hea tah hen qui —hihqui jaabi sca.

¹⁰Honancatsihquin sca:

—¿Miabi hihquish jenquetsahax min bero siriscaiquin? —hahcanquin.

¹¹—Jesus janeya jonin huaho berojaxon heen bero qui betsamxon hea Siloé janin nashitanhue hahcah tah hen nashihi sca cahaqui jisresscanoxon —hihqui.

¹²—¿Jahuen hin, jaa joni?

—hahcanquin.

—Hen ta hen honanyamahi —hahquin.

Benche yoca yocacacquin

¹³Benche hihpahoni joni fariseobo janin sca bocanquin. ¹⁴Tantiti neten cahen Jesusen huaho berojaxon jahuen bero rohajanish. ¹⁵Fariseobaan sca yocarihbiquin:

—¿Jenquetsahaxon miin bero rohajaxquin? —hahcanquin.

—Jaan heen bero qui huaho tsamanah benashixon tah hen jisresscai —jato jaquin.

¹⁶—Papa Diosen raanahma tah qui. Tantiti neten jan tantibahinayamahi copi tah non honanai —hihcani caibo fariseobo sca.

—¿Jenquetsahaxon hohchayahpa jonin jascapa hahan honanti jatihquin?

—hihcani caibo rihbi. Caibo huetsa shinanya hihnon caibaan rihbi huetsa shinanquin. ¹⁷Benche hahquirihbi yocacanquin:

—Mia ta bero rahonaxqui. ¿Mian jisi jenquetsahpa joni quin? —hahcanquin.

—Papan joi yohinica tah qui —hahquin. ¹⁸Jan benche hihpahonixon bi rahma pari jisi judiobaan nincacatsihyamahi. Hihcoina shinanyamacanquin. Jahuen papa, jahuen mama yocarihyamaxon hihcoini jaa yohuanai shinanyamacanquin.

¹⁹—¿Nea hin, maton baque, benche ta cainnishqui hih man jain?

¿Jenquetsahaxon sca rahma jisiquin? —hahcanquin. ²⁰Jascahah:

—Jaa ta noquen baque qui, non tah non honanai. Jan benche cainni tah non honanrihbihi. ²¹Jenquetsahaxon jan rahma jisiquin, non tah non honanyamahi. Tsoan jahuen bero rohajaxquin, non tah non honanyamarihbihi. Jaabi yocanahue. Hani sca ta jaiqui, jaanbi ta mato yohitihiqui.

²²Judiobo qui raquexon jahuen papan, jahuen maman jascajaquin. Judiobaan cahen jatihixonbi yohinish, Cristo tah qui hihquibo jatihibi tah non potati jai, noquen tsinquiti xoboho mapeyamascaábo, tsoanbi jato yohuanquihnyamascaábo tah non jato potatihi, hahcanquin huesti shinanyaxon. ²³Judiobaan jascahipi copi raquetax:

—Jaa ta haniscai qui. Jaabi yocanahue —hihresi jahuen papa. ²⁴Jascaraiya, rabe coti sca benche jahuen maman bihni joni hahquirihbi quenamacanquin.

—Papa Diosen caya ta hea rohajahaxqui hihhue. Hoa joni ta hohchamis qui, non tah non honanai —hahcanquin.

²⁵—Jahuen hohcha yamahihquin, hen ta hen honanyamahi. Nea res ta hen

honanai: benchepahonixon bi ta hen rahma jisi —jato jaquin.

²⁶—¿Jahueja mia jaaxquin? ¿Jenquetsahaxon mia jismahaxquin? —hahcanquin.

²⁷—Moa ta mato yohihahqui. Hen yohihah bi tah man nincacatsihyamahahqui. ¿Jahua copi man hahquirihbi nincacatsihquin? ¿Mato rihbi man jahuen haxenicabocatsihquin? —jato jaquin. ²⁸Jaa sinajascacanquin:

—Mia tah min jahuen haxenica qui. Noque tah non Moisesnin haxenicabo qui. ²⁹Papa Diosen ta Moises yohinishqui, non tah non honanai. Jahuerahnohax hoa joni jonishquin, non tah non honanyamahi —hihcani. ³⁰Jaabo jascaraiya:

—Man jascaraiya tah hen rahtetai. Jahuerahnohax jaa jonishquin man honanyamahi bi ta hea bero rohajahaxqui. ³¹Hohchamisbo ta Papan nincayamahihqui. Jaa tah non honanai. Papahon shinancoinaibo, Papa queenai quescajahibo, jascapahbo ta Papan nincaquihqui. ³²Tsoanbi ta benche cainni joni bero rohajayamanishqui. Benche rohajahi ta tsoan jascapanima qui, nete jamenoni tian, rahma caman. ³³Papa Dios betan hihiyamaxon cahen Jesusen jahuejatibi hahtipahyamaquehaniqui —jato jaquin.

³⁴—Mia tah min hohchaya bi res piconihqui. ¿Jascapahxon bi min noque honanmacatsihquin? Catanhue —hahxon picocanquin.

Jaton shinan xehpohibo

³⁵Catanhue hahcaibo joi nincaxon benche hihpahoni meraxon Jesusen yocaquin:

—¿Noquebaquen yohihah min nincacoinyamahin?

³⁶—¿Tsoa jaa quin, hapon, hen nincacoionnon? —hahquin.

³⁷—Hea min jisi tah hen qui, mihbetan yohuanai.

³⁸—Hean tah hen nincacoinai, hihbon —hihxon raboxonen nichish betihihpaqueti.

³⁹—Honanaħbo tah hen naiħoh queħax joniqi, jisyamahibaan jisibo, jisibo rihbi benche sca banenon —hahquin Jesusen.

⁴⁰Jan jascajahi caibo fariseobaan hochomaxon nincaxon yocacanquin:

—¿Noque rihbi non benche quin? —hahcanquin.

⁴¹—Bencheħax tah man hohcha yamaquehanai. Non tah non jisi man jai copi ta maton hohcha banetihqui —jato jaquin.

Carnero chique

10¹—Hen mato yohinon nincanahue. Carnero chiqueho hihquicatsihquish xehpoti janinma bi huetsanco hinatax hihconica ta yometsoh qui, bichinmis joni. ²Xehqui janin hihconica ta carnero coirannicah qui.

³Jan hihconon ta xehpoti coirannicahon queħpenxoniqui. Jahuen carnerobaan rihbi ta jahuen joi nincaquihqui. Jaan rihbi ta jaton jane quenapaquexon jato cainmahiqui. ⁴Jahuenah rahsi jatihibi cainmaxon ta jato bebixoniqui. Jaton hihbaan joi nincaxon ta carnerobaan chibanihqui. ⁵Huetsa joni cahen chibanyamacanquin, jahuen joi honanyamaxon. Jato bichi huetsa jahuiya cahen jabaescani —Jesusen jato jaquin. ⁶Honanaħbo jato jascajaquin yohihah bi nincayamacanquin. Jan yohuanai honanyamacanquin.

Jesus noquen coirannicah siri

⁷Jaa copi jato hahquirihbi yohiquin: —Man honannon hihxon tah hen yohihi: hea tah hen carnero jano hihcoti quescapa qui. ⁸Hea joriyamanon jonibo ta yometsoħbo qui, bichinnicabo. Carnerobaan ta jato nincayamanishqui. ⁹Hea tah hen jano hihcoti quescapah qui.

Hea janin hihcoħibo ta queyoyamanox mananicabo qui. Hihcoħax ta picorihbihihqui, jaton piti rihbi pishinyamahi.

¹⁰Yometsohti res ta yometso jahuiqui. Reħtehi rihbi jahui. Masajahi rihbi jahui. Jihuetahbo tah hen hea jahui, siripi jihuetahbo. ¹¹Hea ta carnerobo coirannicah siri qui. Siri coirannicahon ta jahuen carnerobo jeneyamahihqui, reħteħibaan bi. ¹²Jahuenah que ma bi carnerobo coirannon hihxon copijaha jonin cahen hino jahui jisish carnerobo potabahini caresi, coirannicah hihyamahax copi. Hinon sca cahen hahchixon jato jabisjaquin. ¹³Coriqui copi coiranhue hahca bi cahen joni jabatih, carnerohon shinanyamaquin.

¹⁴Hea tah hen carnero coirannica siri qui. Henabo tah hen hean honanai. Henabaan rihbi ta hea honanihqui. ¹⁵Heen papan hea honanai quescajaquin tah hen hean rihbi heen papa honanai. Carnero mahuyamanon hihxon tah hen paxajaquin hehri jaton sinataħbo hean reħtemahi. ¹⁶Hea ta huetsa carnerobo jaribihi, nea chiquehoh queħama. Jaabo rihbi beti tah hen jai. Heen joi ta nincayaxihcanihqui, huesti repinica res janon, coirannicah rihbi huesti res.

¹⁷Hahquirihbi teehihnoxon tah hen heen jihuetahbo jihuenon hihxon jaton sinataħbo paxajaquin hehri reħtemahi. Jaa copi ta heen papan hehon shinanihqui. ¹⁸Tsoanbi ta hea reħteresyamahiqui. Heanbi shinanon tah hen hehri jato reħtemahi. Heanbi shinanax ta hen hahquirihbi teehihtih, jascahue heen papan hea janı —Jesusen jato jaquin.

¹⁹Jan jascajaquin yohihah, caibo judiobo huetsa shinanya janon caibo rihbi huetsa shinanya hihqui. ²⁰Mesco shinanya hihquibaan bi hichaxon caibaan yohiquin:

—¿Jahua copi man hashoan nincatihin? Yoshinyahpa tah qui. Tehquehich ta jaa jaiqui.

²¹—Jan yohihi joi ta yoshinyahpa joninahma qui. ¿Yoshiman benche jismati hahtipahiquin? —hahcanquin caibaan rihbi.

Jesus queenyamahibo judiobo

²²Jene tian sca jaiya cahen Jerusalem janin judiobaan fiesta jai, Papan xobo jato behnajaxonnihbo copi fiestajacanquin. ²³Jaa xoboho sca Jesus nichí, Salomon janeya chiquehoh.

²⁴Hahqui tsinqui jaquexon yocacanquin:

—¿Jahuentian caman min noque honancasquimamatihin? Cristo hihxon, Hea ta hen Cristo qui hahquin noque yohiquin sirijahue —hahcanquin.

²⁵—Moa hen mato yohihah bi tah man hea quesahi shinanai. Heen papan hea Jascajahue hahca hen hahcaibo ta jaa jixxon hahan hea honanti qui. ²⁶Jaabi tah man nincayamahi, heen repinica janinhahmaxon copi. ²⁷Hean quenahah ta heen carnerobaan hea nincaquihqui. Hean rihbi tah hen jato honanai. Hea ta chibancaniqui. ²⁸Hean tah hen jato teehihmahi, queyoyamanox mananon, jahuentianbi manoyamanon. Heen mequeman hen xecohibo ta tsoanbi hea bichintimahihqui. ²⁹Heen papan ta hea jato hinaniqui. Jaan ta jatihibi mahuiniqui. Jaan xecohi ta tsoanbi mebichintimahihqui. ³⁰Heen papa betan tah hen huesti yora qui —jato jaquin Jesusen.

³¹Judiobaan sca ta macan bihribinishqui, Jesus rehtecatsihquin hahan tsacanoxon. ³²Macan bichiton jato yohiquin:

—Hen hicha siri hahcaibo tah hen mato jismascaí, Papan hea Siribojahue hahcah. ¿Jahuemeha hen hahcaí copi man hea rehtecatsihquin? —jato jaquin.

³³—Min siribo hahcaima bi min Papa Dios qui tiromahi yohuanai copi rahan. Mia jonihax bi Diosax quescapi yohuanai copi —hahcanquin. ³⁴Jesusen sca:

—¿Davidinin huishani joi janin nea huisha yamaquin? ¿Mato tah man diosbo qui hah ta hen mato jai hahquin huishayamanishquin? ³⁵Papan huishamani ta tsoanbi huetsajati hahtipahyamahiqui. Jato yohihi Mato tah man diosbo qui Papa janí que bi man hehqui rainyamascain? ³⁶¿Hea ta hen Papa Diosen baque qui hen jai copi man Dios qui tah min tiromahi yohuanai hah man hea jain? Baquen hahxon Papan hea naihohxon raanni que bi ¿man jascarain? ³⁷Heen papan teebo hean hahyamahiya hea hihcoinaí shinanyamanahue. ³⁸Hen hahcoinaíya, hean mato yohiha copi que ma bi hean hahcaí jixxon copi hihcoinaí shinannahue. Jascajaquin tah man honaxon nincacointihi, hea janin heen papa hihqui, hea rihbi heen papa janin hihqui —hahquin. ³⁹Jascahiton jaabaan hahquirihbi bihcatsihqui bi cahi, mequen sca cahabo.

⁴⁰Jaatian sca cahax Jordan huean hahquirihbi pohquejaquetax, janoxon Juaman nashimamenoni janin cahi. Cahí nocotax janobi sca baneti. ⁴¹Jano sca hihqui honanax ta hihti caibo hahqui nocoti bocannishqui.

—Juaman ta hahan honanti hahyamanishqui. Hahyamahax bi ta hihcoini nea joni qui chaninishqui, jatihibi jan yohini quescabi ta nea Jesus jaiqui —hahcanquin. ⁴²Janoxon sca hichaxon nincacoincanquin.

Lázaro mahuatái

11 ¹Betania jema janin ta Lázaro janeya joni jihuepahonishqui, jano María jahuen hohshi Marta betan jihuetái jeman. ²Jaa Marianen ta hahan hinintinin noquen hihbo tachixon jahuen

boon tasonishqui. Jahuen roha cahen Lázaro. Lázaro cahen hihti hisini.

³Hisinaiya ta jahuen chocabaan huetsa joni raannishqui:

—Min hahan shinanai joni ta hisiniqui, hihbon —yohihi canon.

⁴Yohiha Jesusen yohiquin:

—Mahuanoxonma bi ta hisiniqui. Papa Dios nete hihbohi jisibo ta hisiniqui. Hea Papan baque xaba hihbohi honanahbo ta hisiniqui —jato jaquin Jesusen. ⁵Jaabo ta Jesus hihti queenpahonishqui, Marta, jahuen huetsa, Lázaro rihbi. ⁶Jan hisinai honanax bi janobi rabe neten hihribihi. ⁷Rabe neten hihxon sca jahuen haxenicabo yohiquin:

—Judea main hahquirihbi canon bonahue —hahquin. ⁸Jascahah:

—¿Rahma pishca mia janohahbaan macaman tsacaquin rehtecatsihqui que bi min hahquirihbi caribicatsihquin, Maestron? —jahuen haxenicabaan Jesus jaquin.

⁹—¿Huesti neten doce hora yamahiquin? Bariyahpan nichish tah non joxcorohyamahi, bari xaba jisish. ¹⁰Yame nichish tah non joxcorohai, jano nihti jisyamahax —jato jaquin. ¹¹Jato jascaxon:

—Noquen huetsa Lázaro ta hoxahihqui. Mohini tah hen cahí —jato jaquin.

¹²—Hoxahax ta hahquirihbi rohatihiqui, hihbon —hahcanquin jahuen haxenicabaan. ¹³Lázaro mahuatipi Jesusen yohihi bi hoxaresai shinancanquin. ¹⁴Jaa copi ta jato sirijaquin sca yohinishqui:

—Lázaro ta mahuatipishqui.

¹⁵Jahuerohahi tah hen hea jano hihyamahipiqui, man honancoinnon. Man nincacoinnon hihquish ta hen jano cayamahipiqui. Jaabi, jisnon bonahue —Jesusen jato jaquin.

¹⁶—Noque rihbi canon bonahue, hahbetan mahuanoxon —hahquin Tomasén, rabe nane hahcaibo Tomasén.

Jesus noquen teehihmanica

¹⁷Nocoxon sca chosco neten sca tsahonipibo yohihibo Jesusen nincacoin.

¹⁸Betania ta Jerusalem hochoma qui, media hora tahen cahah. ¹⁹Jaa copi ta janohax hihti caibo judiobo Marian xoboho bocannishqui, jano Marta betan María jihuetai xoboho. Jatón roha mahuatipi quen manahi bocani. ²⁰Jesus nocoti jahui yohiha jaa behchihí Marta cahí, xoboho María banenon.

²¹Behchixon yohiquin:

—Mia neno hihquiya ta heen roha mahuyamaquehaniqui, Hihbon. ²²Jan mahuatipi que bi ta min Papa yocacai rahsi mia hahxontihiqui. Hen tah hen honanai —hahquin.

²³—Roha ta huenirihbitihiqui —hahquin Jesusen.

²⁴—Nete queyotaiya Papan noque Hueninahue hahca ta

huenirihbiyaxihiqui. Hen tah hen honanai —hahqui Marta. ²⁵Jesusen sca:

—Hea ta jato hueninica qui, teehihmanicah. Hea nincacoinai joni ta mahuatax bi teehihribitihiqui. ²⁶Jihuxon hea nincacoinai joni ta queyonox jascabi mahuatatah jatimahiqui. ¿Mian min hea hihcoinaí shinanyamahin? —hahquin Jesusen.

²⁷—Hen tah hen mia hihcoinaí shinanai, Hihbon. Mia tah min Cristo qui, Papan baque. Mia tah min naihoq uehax jonichah qui. Min hihcoinaí tah hen shinanai —hahquin Martán.

Lazaroya Jesus huaohihqui

²⁸Jascajaquin yohihax jahuen shara quenahi cahí. Nocoxon hexti pishca join jahuen shara yohiquin:

—Honanmanicah ta nocoscaiqui. Mia ta quenamahiqui —hahquin. ²⁹Nincacax, histon huenicahuanax, picotax cahí.

³⁰Jema janin cahen Jesus nocorihyamahi,

jano Martan jaa behchitana janin banetahbahi. ³¹Maria histon huenicahuanax picotai jixson, Tsahon janin ta huinihi cahiqui hihxon jaa manahibaan chibanquin.

³²Jesus janin Marfa nocoxon, merahax, Jesusen tahe naman betihihpaqueti.

—Mia neno hihquiya ta heen roha mahuayamaquehanihqui, hihbon —hahquin huaohihanan. ³³Jaa huaohihquiya hahbe jahui judiobo rihbi huinihiya, jahuen jointi hihti xecahihniquin. Masa shinanscaquin.

³⁴—¿Jahuen man tsahonipiquin? —jato jaquin.

—Jisihue, hihbon —hahcanquin.

³⁵Jesus huaohihscái. ³⁶Huaohihqui jisish: —Jise. Hahan ta hihti shinanihqui —hahquin judiobaan.

³⁷—¿Benche jismahipixon cahra nea rihbi mahuayamanon rohajati hahtipahyamaquehahniplashquin? —hahcanquin caibaan rihbi.

Lázaro teehiribihi

³⁸Jesus sca hahquirihbi jointi hihti xecahihnihax tsahon janin nocoti cahi. Tsahonxon macan champanin behpohipibo janin nocoti.

³⁹—Macan janabohannahue —jato jaquin Jesusen.

—Neatian ta pisiscaiqui, hihbon. Chosco nete sca tah qui jan hihqui —hahquin Martan, yamanicon chocan.

⁴⁰—¿Hihcoinaí shinanxon tah min noquen Papa nete hihbohi jistihí hen mia jayamahaquin? —Jesusen jaquin.

⁴¹Jaatian sca macan janabohancanquin. Bochiqui sca jixson:

—Papan, hen yocacah tah min nincacai. Hahxon tah min hea jai. ⁴²Hen yocacai tihibi tah min nincacai. Hen ta honanai. Jaabi, nea neno nichibaan nincanon hihxon tah hen mia yohihi, mian min hea raanni hihcoinaí

shinanahbo —hahquin. ⁴³Jascaxon coshin bi res quenaquin:

—Lazaron, picohue —hahquin.

⁴⁴Jaatian sca hihqui joni picoti. Jahuen mequen, jahuen tahe chopa quexen yabi yabihah, payoman rihbi bebephipibo.

—Pecannahue, jan nihtatahnon —Jesusen jato jaquin.

Jesus bihnoxon yohinanaibo (Mt. 26.1-5; Mr. 14.1-2; Lc. 22.1-2)

⁴⁵Jan Lázaro teehihmahí jixson Marfa manahi jahui judiobaan sca hihti caiboxon nincacoinquin. ⁴⁶Caibo rihbi jaton hapobo yohihi bocani. Nocoxon, Jasca ta jaaxqui, hahcanquin. ⁴⁷Yohihah sacerdoté hapobo betan fariseobo tsinquiti, hapobo rahsi.

—¿Rahma can? ¿Non jahuejatihin? Hoa jonin ta hahan honantijahiqui, hicha.

⁴⁸Jan jascajaresnon non jahua hahyamahiya ta jatihixonbi jaa sca chibanyaxihcanihqui. Romanobo sca joxon ta noquen janoxon Papa Dios yocati xobo pohtastihiqui, noquen jihuetaho rihbi ta noque bichinyaxihcanihqui —hahcanquin. ⁴⁹Huesti joni sca jato tocan nihinati, Caifas janeya joni. Sacerdotebaan hapo hihxon jato yohiquin:

—Maton tah man jahuabi honanyamahi. ⁵⁰Huetsa jonibo jihuenon huesti joni mahuatah ta siri qui. Noquen jihuetaho jatihibi queyoyamanon jascatihi bi tah man honanyamahi —jato jaquin. ⁵¹Hahmebi shinanxonma ta jascajanishqui. Jaa bari tian sacerdoté hapo hihxon ta honanxonma bi jayaxihqui joi yohinishqui. Jaton caibo jihuenon Jesus mahuatihí yohihi. ⁵²Jaton caibo res jihuetaho Jesus mahuayamahi. Hocho hocho jihuetai Papan baquebo tsinqinoxon cahen Jesus mahuati, jato huesti yorajanoxon. ⁵³Caifas jascari yohuanipiya sca Jesus rehtenoxon yohinan yohinancani, jatihibi neten.

⁵⁴Jaa copi ta judiobaan jisonnma sca jonetax Jesus nihnishqui. Janohax caresscai, chiponqui. Jano tsoa yamaha hochoma, Efrain janeya jeman sca nocoti. Jano baneti jahuen haxenicabo betan. ⁵⁵Judiobaan pascua fiesta hochomascaiya ta hocho jihuetaibo Jerusalem janin bocannishqui. Jatón rishta sohuamahi bocani, janin pascua fiesta noconon hihquish. ⁵⁶Nocoxon Jesus benacanquin. Papan xoboho hihquihax yohinancani: —¿Fiesta janin jaa jotimahiquin? ¿Jahua min shinanain? —yohihahnancani. ⁵⁷Jasca jaibaan bi jatón hapobaan jato yohiquin: —Jano jan hihqui honanxon, noque yohinahue, non porisia bihmanon —jato jaquin.

Jesus tachocai haibo

(Mt. 26.6-13; Mr. 14.3-9)

12 ¹Pascua fiesta joti seis nete pishinaiya cahen Betania janin Jesus joribihi. Jano Lázaro jihuetai jema, mahuatipi que bi jan hahquirihbi teehimahi. ²Jesus nocoscaiya pitijacanquin, hichaxon piti. Martan cahen jato piti metexxonquin. Misaxon Jesus betan pihibo tocan sca Lázaro tsahoti. ³Marian sca nardo hahan hininti pomo bocho bihxon Jesus tachiquin. Hihti copi, hahan hininti. Tachixon, jahuen boon sca tasoquin, jatihobi xobo hinin potonon. ⁴Jaatian sca jahuen haxenica Judas Iscariote, Jesus paraxon bihmayaxihquiton yocaquin: ⁵—¿Jenquetsahpahn jahuen hininti tres mil soles copi maromayamahaxquin, jahuaborajomabo sca hinannoxon? —jato jaquin Judasen. ⁶Jahuaborajomabohon shinaxon copima jaan jato jascajaquin. Yometso hihxon copi jascajaquin. Jaa rihbi jatón coriqui coirannicahax ta jatón coriqui rihbi yometsohpahonishqui. ⁷Jesusen sca Judas yohiquin:

—Jenehue. Hea mahuataiya hahan hea hininjati ta hea hininjaxonihqui, jenehue. ⁸Mato janin ta jahuaborajomabo jascabi jatihiqui. Hea tah man yamajayaxihqui —jato jaquin.

Lázaro rehtecatsihquibo

⁹Jan jano hihqui honanax tsama bi res judiobo jaa jisi bocani. Jesus huestima bi Lázaro rihbi jiscatsihqui bocani, hihquipi que bi hahquirihbi huenihipi joni jiscatsihqui.

¹⁰Jaa copi ta Lázaro rihbi rehteti shinanscannishqui, jatón hapobaan. ¹¹Lázaro copi hichaxon judiobaan jato potabahinxon Jesus sca nincacoinaiboya ta jatón hapobo sinanishqui. Jaa copi ta Lázaro rihbi rehtecatsihscacannishqui.

Jerusalem janin Jesus hihcohi

(Mt. 21.1-11; Mr. 11.1-11; Lc. 19.28-40)

¹²Huetsa neten sca ta fiestajahi bohibo tsinquirihmanishqui. Fiesta janin ta Jesus jahuiqui hahquin yohihahbo nincacanquin. ¹³Honanax binon pehi bihbahinax Jesus behchihbi bocani. Quenacanahi bocani:

—Hosanná. Nete hihbaan raanai joni ta jahuiqui, israelibaan quiquin hapo. Papan shinanyahpa tah qui —hihcanahi bocani.

¹⁴Jaschibaan bi cabacho baque merahax jaa cahtsahotax Jesus jahui. Jan jascanon ta huishani joi jaiqui:

¹⁵Raqueyamanahue, Sion jema baquebon. Maton quiquin hapo ta jahuiqui, cabacho baque cahtsahotax.

¹⁶Jaa huisha joi nincamenoxon ta jahuen haxenicabaan honanyamanishqui. Jan naihoh cahipi cahchiqui ta jan jascayaxahnon huishani joi jai shinancannishqui. Jaatian pari ta honancannishqui, Jesusen hahyaxihqui jaabaan huishani honanscaquin. ¹⁷Caibo

jascari quenacananon cahen caibaan yohibonaquin. Lázaro mahuatipi bi ta picohue hahxon jan hahqirihbi teehihmahí non jisipiqui hahbonaquin. ¹⁸Papan coshiyaxon Jesusen jascajaquin hahquipi nincacax tsinquijaquetaibo jaa behchihí bocani. ¹⁹Bohiboya sca: —Jisnahue. Non tah non jahuabi hahyamahi. Jatihixonbi ta jaa chibancaniqui —hahcanquin fariseobaan sca.

Jesus benahi nahuabo

²⁰Caibo fiesta janin bohíbo ta jaton nahua quescapahbo sca janishqui. ²¹Felipe cahen Betsaida jema janinhah, Galilea mai meha. Felipe qui caxon, jaa nahuabaan yocaquin: —Noquen tah non Jesus jiscatsihqui, hapon —hahcanquin. ²²Andres yohíhi sca Felipe cahi. Yohíhax, Felipe betan sca cahi, Jesus yohíhi. Yohíhah bi: ²³—Hea noquebaque Papan shinanya hihqui ta rahma jisnoxihcanihqui. ²⁴Nincanahue hen mato yohinon. Main paqueyamahax ta bimí bero jaa huesti banetihqui, queyoyamahi. Banahoh queyotax pari ta bimí hicha caichihqui. ²⁵Mahuapaho hihxon Papan joi bihcatsiyamahíbo ta mahuatihiqui. Non main res jihuetah ta jahuama qui hihquibo ta queyoyamanox manatihqui, jihuecointi. ²⁶Heen hahxontíbo ta hea chibanti jaiqui. Jano hea hihquítion tah heen joníbo rihbí hihtihiqui. Hea hahxonai joníbo qui rihbí ta heen papa sirípi yohuanayahíhiqui.

Mahuanoxihqui Jesusen yohíhi

²⁷Rahma tah hen masa shinanai. ¿Jahua hen yohítihín? ¿Janoxihquibo tíromabo hea cahnemahue Papan, hih hen jatíhín? Híhyamahi. Hea janoxihquibo copí tah hen nea nete qui noconihqui. ²⁸Papan, mia nete hihbo

shinanahbo jahue —hahquin Jesusen. Jaatian naihoh quehax yohuanai nincacanquin.

—Jascjaxon tah hen hahribitíhi —hihqui. ²⁹Hochomaxon nincacax tsamajaquetaibo yohuani:

—Terenhíh ta jaiqui —hihcáni.

—Papan yonoti ta hahbetan yohuanihqui —hihqui caibo rihbí.

³⁰Jesusen sca jato yohíhíquin:

—Maton honannon hihquish ta yohuanihqui, hean honannon hihquishma. ³¹Mai mehabaan hohcha casticanti hora ta nocoscáiqui. Rahma ta mainxon yononica yoshín naman potapaquenoxihquiqui. ³²Hea jihuín hueonhíhniplibó tah hen jatíhibí joníbo hehqui jomatíhi —jato jaquin. ³³Jihuín hueonahbaan jan mahuanoxihqui honanahbo hihxon jato jascajaquin yohíhíquin. Tsamajaquetaibaan sca yocaquin:

³⁴—Cristo roqui queyoyamanox manayahíhiquiqui. Huishaníhbo joi roqui jascari jai. ¿Jahua copí sca mín Noquebaque ta hueonhíhniplibó hah mín noque jain? ¿Noquebaque mín hihqui tsoa quin? —hahcanquin.

³⁵Jesusen jato yohíhíquin:

—Basímaxon sca tah man xaba jísti jenexihqui. Xaba chían níhnehue, jani yamenon. Bahquish chían níchi jonín ta jahuen níhti honanyamahíhiqui. ³⁶Xaba jaxon jaa xaba nincacoinnahue, xabapan baquebo janoxon —jato jaquin. Jato jascajahax, caresscai, jaabaan jisyamascanon.

Nincacoinyamahi judíobo

³⁷Jaton jisnon bi hicha hahan honanti jan hahcai bi nincayamacanquin.

³⁸Papan joi yohínica Isafásnen yohíni quescapahbo:

¿Non yohíhah bí tsoan

níncaquihquin, híhbon? ¿Nete

hihbaan jahuen coshi jato
jismahah bi tsoan nincacahiquin?
hihqui jaa huisha joi. ³⁹Jascapahboxon
copi ta nincacoinyamannishqui. Huetsa
joi rihbi ta Isafasnen huishanishqui:

⁴⁰Jaton beron jismis hihquish ta
benchecahincaniqui. Jaton
jointinin nincacoinmis hihquish ta
jaton jointi xehpocahiniqui, hean
jato rohajamis hihxon ta jaton
shinan huetsajacanicui

hihqui. ⁴¹Papan xaba jisxon ta
jascajaquin Isafasnen huishanishqui.
Jasca ta Papa jaiqui jato japahonixon
jascajaquin sca huishaquin.

⁴²Jaabi Jesusen yohihah hichaxon
nincacoincanquin. Caibo jaton jonibaan
rihbi nincacoinquin. Nincacoinxon bi
fariseobo qui raquexon tsoabi
yohiyamacanquin.

—Tsoanbi noque
yohuanquihnyamascanon noquen
tsinquiti xoboho noque
mapemayamascannmis —hihcani.
⁴³Papan hea siri jisnon yohipan hihtihi bi
hapobaan hea sirijaquin yohuanquihnon
tsoabi yohiyamapan hihxon
yohiyamacanquin.

Nincayamahiboya Papan jato casticanyaxihqui

⁴⁴Jaabo netetai bi coshin bi res Jesus
yohuanai:

—Hea nincacoinax hinamehtaibo ta
hehqui hinamehyamahiqui. Hea raanni
qui caya ta hinamehtiqui. ⁴⁵Hea jisi jonin
ta hea raanni rihbi jisiqui. ⁴⁶Jato
xabajahi tah hen nai naman joniqui,
hehqui hinamehtaibo bahquish chian
baneyamanon. ⁴⁷Hea nincacoin bi
nincaresaibo tah hen heanbi
casticanyamahi. Mai mehabo
casticannoxonma bi tah hen jato
teehimahi joniqui. ⁴⁸Hea Johue
hahyamaxon, heen joi rihbi

nincacatsihyamahibo ta honantiyahpabo
qui. Hean yohihi joi ta hahan jascapahbo
honanti qui, nete queyoscaiya.

⁴⁹Hehmebi shinanax ta hen
yohuanyamahi. Hea raanni heen papanbi
ta hea yohihiqui. Jascari yohuanhue, jaa
yohihue hea jaquin. ⁵⁰Jahuentianbi
queyoyamanox manati jato jihuemahue
hih ta jaiqui. Jaa copi ta heen papan hea
yohihi quescabijaquin hean mato yohihi
—jato jaquin Jesusen.

Jahuen haxenicabo Jesusen tachocai

13 ¹Pascua fiesta nocorihyamahi bi
mai jenebahini Papa qui cati sca
jan jai Jesusen honanquin. Jahuen
jonibohon shinaxon mahuanoxon
caman jatohon shinanquin.

²Pascua piti piriyamahiboya cahen
Judas, Simon Iscariotenin baque, tiroma
yoshiman bihxon tiroma shinan jahuen
jointi janin niascaquin, Jesus paraxon
bihmanoxahnon. ³Pascua piti pihi
tsinquiscacani, Jesus jahuen haxenicabo
betan. Mian sca jato jatihibi hihbojahue
Papan jai cahen Jesusen honanquin.
Jahuen Papa janinhax jonish bi
hahquirihbi hahqui cahen
honorihbiquin. ⁴Misa janinhax huenixon
sca jahuen tari potahax hani payoman
chinexehti. ⁵Bandeja qui jene chicoxon
jahuen haxenicabo tachoquin. Tachoxon
hahan jan chinexehtai payoman sca jato
tasoquin. Jascajaquin jato
tachopaquequin.

⁶Simon Pedro qui nocoquihranscai.

—¿Hea rihbi min tachocatsihquin,
Hihbon? —hahquin Simoman.

⁷—Hen mia tachoca jahua
hihcatsihquiquin, rahma honanxonma bi
tah min huetsa tian pari honanyaxihqui
—hahquin Jesusen.

⁸—Hea tah min jahuentianbi
tachotimahi, hihbon —hahsaquin
Pedronen.

—Hen mia tachóyamahah tah min henama sca jatihi —hahquin Jesusen.

⁹—Hea tachoxon mepanxon manashimarihbihue, Hihbon —hahscaquin Simon Pedronen.

¹⁰—Nashitanax ta tsoabi nashiti pishinyamascaiqui, tachoquiti huesti pishini, jatihobi rishtama sca hihnoxon. Mato tah man rishtajomaboscai, hihcax bi jatihibima —jato jaquin Jesusen.

¹¹Jesus parannoxihqui joni honanxon copi jato jascajaquin, jatihibima jaquin.

¹²Jato tachoquin queyoxon jahuen chopa sahuerihbihax jahuen tsahotinin tsahopaquexon jato yocaquin:

—¿Jahua man haxenon hihxon hen mato tachocain? ¿Man honanyamahin?

¹³Hihbon, Honanmanican, hah tah man hea quenaquin jai. Hahcoinquin. Jaa tah hen qui. ¹⁴Maton hihbo, mato honanmanicah rihbi hihxon bi hean mato tachocaiya tah man maton rihbi joni huetsa tachotihi. ¹⁵Hen hahcai jixson man jascajaribinon tah hen mato jismahahqui. ¹⁶Mato tah hen yohicoinai. Yonoti ta jahuen hapo mentan hashoan tee hihboma qui. Raana joni rihbi ta jaa raanai joni mentan hashoan yohuan hihboma qui. ¹⁷Nea hen mato yohihi joibo honanxon, hen mato yohihi quescabijahax tah man hahan jenimati jaresscayaxihqui.

¹⁸Mato jatihibi qui tah hen yohiyamahi. Heen caisaibo tah hen honanai. Papan huishamani joi jai quescabi ta janoxihquiqui. Heen paan pihi jonin ta jotsistonon hea jamaquihqui hihqui jaa huisha joi. ¹⁹Janoxihquibo jaríyamahi bi tah hen mato rahmabi yohihi, jaressca jaiboya man hea hen qui man honanxon. ²⁰Hen mato yohinon nincanahue: hean raanah cahax nocotaiton mato johue hahcaibaan ta hea rihbi johue hahquiqui. Johue hea jaibaan ta hea raanni rihbi johue hahquiqui.

Judasen bihmanoxihqui Jesusen yohihi
(Mt. 26.20-25; Mr. 14.17-21; Lc. 22.21-23)

²¹Jato jascajaquin yohixon masa shinanxon jato yohicoinquin:

—Man honannon hihxon tah hen mato yohihi: mato tocan tsahotai huestichin ta hea paranxon bihmanoxihquiqui —jato jaquin. ²²Jahuen haxenicabo bejisahtanani.

—¿Tsoa yohihiquin? —shinancanquin.

²³Hahan Jesus queenai jahuen haxenica cahen Jesus senenbi tsahoti. ²⁴Simon Pedron sca jaa cohan cohan hihxon:

—¿Tsoa yohihiquin? Yocahue —hahquin. ²⁵Jesus senenbixon yocascaquin:

—¿Tsoa hin, Hihbon?

²⁶—Nea paan tequen netinxon hen hinanai joni tah qui —hahquin Jesusen. Jascaxon paaman netinxon Judas hinanquin. Simon Iscariotenin baque can, Judas. ²⁷Paan teque bichiton jahuen jointi Satanasnen hihbojaquin.

—Hoa min hahcatsihqui hahtanhue, Judasen, hixon —hahquin Jesusen.

²⁸Jahua yohiquin jascahiquin misa janin tsahotaibaan honanyamaquin.

²⁹—Noquen coriqui coiranai copi rah ta hahan fiestajati piti non pishinai marotanhue hahquiqui —shinanquin caibaan.

—Jahuaborajomabo coriqui hinantanhue hah ra ta jaiqui —shinanquin caibaan rihbi. ³⁰Hahtanhue hahca jahuen paan bichish Judas caresscai, yamescai bi.

Behna joi

³¹Caresscaiya Jesusen jato yohiquin:

—Hea noquebaque nete hihbo hihqui ta rahma jisnoxihcanihqui. Jisquin ta noquen Papa rihbi nete hihbo hihqui jiscantihiqui. ³²Hea jixson Papa Dios nete hihbo hi honanaiboya ta nete hihbo

hihxon jato jismatihiqui, jahuen baque rihbi nete hihbo hi honanahbo. Rahmabi ta jascajatihiqui. ³³Basima bi res tah hen mato betan hihtihi, heen baquebaan. Man tah man hea benayaxihqui. Hen judiobo yohihipi quescajaquin ta hen mato rahma yohihi. Hea jano cahiton tah man cati hahtipahtimahi. ³⁴Joi behna ta hen mato yohihi. Nincanahue. Joni huetsahon shinannahue, hean hen matohon shinanai quescajaquin. Joni huetsahon shinannahue. ³⁵Man joni huetsahon shinanaia ta heen haxenicabo mato qui jatihixonbi honancantihiqui —jato jaquin.

Jesus qui Pedro paramehxihqui

(Mt. 26.31-35; Mr. 14.27-31; Lc. 22.31-34)

³⁶—¿Jahuerahnon min canoxihquin, Hihbon? —hahquin Simon Pedronen.

—Hen jano cahiton tah min rahma chibantimahi. Huetsa tian tah min hehchon catihi —Jesusen jaquin.

³⁷Pedronen yocaquin:

—¿Jahua copi hen mia rahmabi chibanti hahtipahyamahin? Hea rehtecatsihquibo que bi tah hen mia jenetimahi —hahquin.

³⁸—¿Mia rehtecatsihquibo que bi min hea jenetimahin? Nincanahue, hen mia yohinon: hatapa queorih jaima bi tah min quimisha coti heen joni hihtima min yohinoxihqui.

Jesus Papa qui cahi bahi siri

14 ¹Masa shinanyamanahue. Papan joi nincacoinnahue. Hea rihbi nincacoinnahue. ²Heen papan jihue janin ta xobo hicha qui. Yamahiya cahen Mato ta hen jihuetijaxoni cahi hen jayamahan. ³Caxon mato jihuetijaxonax tah hen joribiyaxihqui, mato bichí sca. Hea jano hihquiton man mato rihbi hihnon tah hen mato bichi joyaxihqui. ⁴Hahan hean cahi bahi tah man honanai —jato jaquin.

⁵—¿Jahuen min cahin? Non tah non honanyamahi, Hihbon. ¿Jenquetsahaxon non mia jano cahi bahi honantihin? —hahquin Tomasen.

⁶—Hea ta Papa qui cahi bahi qui. Yohuani hihcainai joi tah hen qui. Hahan jihueti ta hea qui. Hea jano hihquiton cayamahax ta tsoabi Papa qui nocotimahiqui. ⁷Hea honanxon tah man heen papa rihbi honanquehanai. Rahma tah man honanscai. Jaa tah man jisiqui —jato jaquin Jesusen.

⁸—Noquen Papa noque jismahue, Hihbon. Jaa res tah non queenai —hahquin Felipen.

⁹—¿Yotihixonpahi hen mato betan hihqui bi min hea honanyamahin, Felipin? Hea jisi jonin ta heen papa jisiqui. ¿Jahua copi min hea Noquen Papa noque jismahue hah min jain?

¹⁰Jano heen papa hihquiton tah hen hea rihbi hihqui. Hea janin ta heen papa rihbi hihquiqui. ¿Min hihcoin shinanyamahin?

Hen mato yohihi tah hen heanbi shinanxon mato yohiyamahi. Hehbe hihxon ta heen papan jahuen tee hahquiqui. ¹¹Heen papa betan tah hen qui, hehbetan rihbi heen papa hihqui.

Hea hihcainai shinannahue. Yohihah copi res shinanyamaxon, heen tee jisxon copi hihcainai shinannahue. ¹²Mato ta hen yohicoainai: hen hahcai teebo ta hea nincacoinai jonin rihbi hahtihiqui. Hen hahcai hahxon bi ta hashoan hanibo rihbi hahtihiqui, hea heen papa qui cahiya sca.

¹³Jatihibi man heen janen yocacai tah hen hahxontih. Heen papa nete hihbo hi honanahbo tah hen hahxontih, jahuen baque hihxon. ¹⁴Man heen janen yocacai jatihibi tah hen mato hahxontih.

Dios Yoshin jan noque hinantih

¹⁵Hehon shinanxon tah man hen mato yohihi man hahtih. ¹⁶Hean rihbi tah hen heen papa yocatih, huetsa yanapannica

jan mato hinannon. Jaa ta jascabi sca mato betan jatihiqui. ¹⁷Jaa ta yohuancoinaí hihbo qui, Dios Yoshin. Jaa jisyamaxon ta mai mehabaan jaa bihtimahiqui, jaa honanyamaxon copi rihbi. Maton tah man jaa honanai. Mato betan ta hihresscaiqui. Mato chicho rihbi sca ta jayaxihquiqui. ¹⁸Jaabiyahpa cayama ta jai. Joribyanoxon tah hen cahi. ¹⁹Mai mehabaan hea jisyamascanon caman ta basima sca qui. Jaabaan hea jisyamascái bi tah man maton hea jistihi. Hea jihuetai copi tah man mato rihbi jihuetihi. ²⁰Jaatian tah man honantihi, hea heen papa betan hihqui, mato rihbi hehbetan hihqui, hea rihbi mato betan hihqui. ²¹Hen yohihi honanxon nincacoinaibaan ta hehon shinannicabo qui. Hehon shinanaibohon ta heen papan rihbi jatohon shinanihqui. Hean rihbi hen jatohon shinanai. Jaabaan hea honannon hihxon tah hen heen yora hean jato jismatihi —jato jaquin Jesusen.

²²Judasen sca yocaquin (Iscarioteninma, huetsa Judasen):
—¿Jenquetsahaxon min noque miabi jismatihin, mai mehabaan mia jisnonma?
—hahquin.

²³Jesusen yohiquin:
—Hehon shinanaibaan ta heen joi bihtihiqui. Jatohon ta heen papan shinantihiqui. Jato qui cahax tah non hahbetanbi jihuetihi. ²⁴Hehon shinanyamahi jonin ta heen joi bihyamahiqui. Hen mato yohihi joi ta henama qui. Hea raanni heen papanah ta qui. ²⁵Mato betan nihparixon tah hen mato yohihi. ²⁶Dios Yoshin sca ta mato yanapannicah qui. Jaa ta heen janen heen papan raanyaxihquiqui, jatihibi joi mato honanmanon. Hen mato yohipahoni joi jatihibi ta mato shinanmayaxihquiqui.

²⁷Hahan jihueti siri mato hinanbahini tah hen cahi. Heen hahan sirijaquin shinanti tah hen mato hinanai. Mai

mehabaan hinanai quescajayamaquin tah hen mato hinanai. Masa shinanyamanahue. Raqueyamanahue. ²⁸Caresscaax ta hen jorihbiyaxihqui hen mato jaah tah man nincacahqui. Heen papan ta hea mahuinihqui. Hehon shinanax cah man jenimahan, heen papa qui hea cahiya. ²⁹Janoxihquibo tah hen mato yohiscaáqui, jaresscaiboya man hihcoinaí shinannon.

³⁰Mato betan tah hen basi yohuanyamascatihi. Mai mehabo yoshin hihbo ta jahuiqui. Hea ta jahuejati hahtipahyamahiqui. ³¹Jaabi tah hen heen papahon hea queenai mai mehabaan honannon hihxon heen papan hea yohihi quesca hean jai. Hueninahue. Caresscanon bonahue.

Bimiyahpa mebibo

15 ¹Hea ta bana jihui yora coin quescapah qui. Heen Papa cahen huai hihbo. ²Jatihibi heen bimijoma mebibo ta jaan mextehiqui. Bimiyahpa mebi jatihibi ta boxtepaquehiqui, hashoan bimi hichanon. ³Mato tah man boxtehahscaqui. Hen mato yohiha join ta Papan mato boxtehihqui. ⁴Jahuen jihui yora jahuen mebin jenebahintimahi quesca hehbetan jascabihi janahue. Hea rihbi tah hen mato betan jascabihi jai. Mebi ta hahmebi bimiti hahtipahyamahiqui; jahuen yora qui rechihah pari bimihí. Mato jascarihibihi; hehbetan bihyamahax cahen jahuabijomabo mebibo.

⁵Hea tah hen jihui yora quescahpa qui, mato cahen heen mebibo. Jahuen yora janin jahuen mebi rechitax hicha bimiyahpa hihqui quescajaquin tah man hehbetan hicha hahtihí. Hehbetan bihyamaxon cah man jahuabi hahtimahí. ⁶Hehqui rechitaima mebibo ta huai hihbaan mextexon potatihiqui mebi choshihi quescaanon. Shinannahue: mebi choshibo ta tsinquixon mapojacanihqui.

⁷Rechitax quesca man hehbetan jihuexon, heen joi rihbi maton jointi janin hihquiya tah man man queenai jatihibi yocatih, hen mato hahxonnon.
⁸Hicha bimiya pabo quescaxon man hicha noquen Papa hahxonaiya ta mato jisxon, heen Papa nete hihbohi jonibaan honanyaxihcanihqui. Jascapahbo tah man heen haxenicabo jatihi. ⁹Heen papan hehon shinanxon hahxonai quescajaribiquin tah hen hean rihbi matohon shinanxon hahxonai. Hen mato hahxonnon jascabijaquin nincacoinnahue. ¹⁰Heen papan hea yohihi quescabijaquin tah hen jai, jaa queenai quescabijaquin hea hahxonnon. Jascajaquin rihbi man hen mato yohihi quescabijaquin jaiya tah hen hea queenai quescabijaquin hen mato hahxontihi.
¹¹Hea jenimahi hihqui quescari man mato rihbi jenimanon hihxon tah hen mato yohihi, man hinti jenimanon. ¹²Nea tah hen mato yohihi: matohon hean shinanai quescajaribiquin maton rihbi joni huetsahon shinannahue. ¹³Noquen hahbe rabetibohon hihti shinanxon tah non mahuanoxon caman jato hahxonquin yanapantih. Jascapa hahxonnicah ta tsoanbi hahxonquin mahuintimahiqui.
¹⁴Hen mato yohihi quescajaquin hahcaibo tah man heen hahbe rabetibo qui. ¹⁵Mato tah hen “heen jonibon” hahyamascai. Jahuen hihbaan hahcai ta jahuen jonin honanyamahihqui. Jatihibi heen papan hea yohipahoni mato honanmaxon copi tah hen mato “heen hahbe rabetibon” hahcai. ¹⁶Hea man caisnima bi tah hen hean mato caisnihqui. Caisxon tah hen mato janescai, man hicha hahqui canon. Man hahcai queyoyamanox mananon tah hen mato raanai. Jascapahboxon man yocacai jatihibi noquen papan mato hahxonnon tah hen mato raanai. ¹⁷Joni huetsahon man shinannon hihxon tah hen jascajaquin mato yohihi.

Jesusyabi noque jistahihmajayaxihquibo

¹⁸Mai mehabaan mato jistahihmahiya honannahue: hea pari ta jistahihmacanishqui, mato chini sca. ¹⁹Mai mehabo man hihquiya cahen mai mehabo matohon queenquehan, jaton caibo copi. Jascapahboma tah man qui. Mai mehabo hihyamascanon tah hen mato caisnihqui. Jaa copi ta mai mehabaan mato jistahihmahihqui. ²⁰Hen mato yohiha joi shinanbehnoyamanahue. Yonoti ta jahuen hihbo mentan hashoan yohuan hihbo hihyamahiqui. Hea tiromajacatsihquin hea chibannixon ta mato rihbi sca chibanyaxihcanihqui. Heen joi nincanixon ta maton joi rihbi nincayaxihcanihqui.
²¹Hea raanni heen Papa honanyamaxon ta mato tiromajayaxihcanihqui heen jonibo man hihqui copi.
²²Hen jato yohiyamahah cahen hohchayahpaboyamahan. Hean yohihah copi ta Honanyamahax tah hen hohchanihqui jati hahtipahyamasacanicui, hohchanihxon.
²³Hea jistahihmahi jonin ta heen papa rihbi jistahihmahiqui. ²⁴Tsoan jascajani que ma bi tah hen Papan coshiyaxon jato hahxonpahonihqui. Jato tocan hen hihyamahiya cahen hohchayahpabohiyamahan. Hen jato hahxonai jisxon bi ta heen papayabi hea jistahihmacanicui. ²⁵Papan huishamani joi janin ta nea jaiqui: Jahua copima bi ta hea jistahihmarescaniqui. Jaa joi jai quescabi ta jacaniqui.
²⁶Mato yanapannicah sca tah hen heen Papa janinxon mato qui raanyaxihqui. Jaa ta yohuancoina hihbo qui, Dios Yoshin. Papa janinhax jahuex ta hehqui yohuancoinyaxihquiqui. ²⁷Hen haxemamenoni tian hea nincanish tah man rahma caman haxehi hehbetan nihnicahbo qui. Jaa copi tah man mato rihbi heya joihi yohuancointi jai.

16¹Hea jeneti shinan tsoanbi mato hinanyamanon hihxon tah hen nea rahsi hen mato yohihahqui. ²Jaton tsinquiti xoboma qui ta mato potayaxihcanihqui, tsoanbi mato yohuanquihnyamascanon hihxon. Mato rehtehebo ta Mia rehtequin Papa Dios hahxonpan hihnicahbo rahsi jatihiqui. ³Heen papa honanyamaxon ta hea rihbi honanyamaxon jascjayaxihcanihqui. ⁴Nea hen mato yohihi quesca jaresscayia Noque ta yohinishqui hihyaxahnahue. Man honannon hihxon tah hen mato yohihi.

Dios yoshiman tee

Mato manati hahtipahparixon tah hen mato honanmamenoxon jaa joi mato yohiyamanihqui. ⁵Hea raanni heen Papa janin sca tah hen canoxihqui. Hen canoxihqui bi tah man Jahuen min canoxihquin hea jayamahi. ⁶Jascjajquin hen mato yohihah copi tah man jointinin benatihi. ⁷Man benatai bi tah hen mato yohicoinei. Hea cahah ta siri qui. Hea cayamahiya cahen mato yanapannica joyamahi. Caxon ta hen raantihi, mato qui jonon. ⁸Joxon ta jatihibi jonibo honancoinmatihiqui, jahua tiroma quin, jahua siri coin quin, jahua Papan casticantihiquin, jato honanmaquin. ⁹Hea nincayamahibo copi ta jaton hohcha copi Papan jato casticanyaxihqui jato honanmatihiqui. ¹⁰Heen papa qui hea cahiya man hea jisyamascai copi ta jahua siri coin quin hihxon jato honanmatihiqui, jihueti honanahbo. ¹¹Mai meha hihbojanica yoshin casticanti jaresscai copi ta tiromabo copi Papan casticanyaxihqui jato honanmatihiqui. ¹²Mato yohiti hicha pari jai bi tah man rahmabi nincati hahtipahyamahi. ¹³Joxon ta yohuancoinei hihbaan mato jatihibi hihcoinei joi honanmayaxihqui. Hahmebi

shinanxonma bi ta Papan yohiha jan nincacai joibo mato honanmayaxihqui. Joyaxihqui bo rihbi ta mato yohiyaxihqui. ¹⁴Hea nete hihbohi honanahbo ta yohiyaxihqui. Hean yohihi joibo bihxon ta jaan mato honanmayaxihqui. ¹⁵Heen papanahbo jatihibi ta henabo qui. Jaa copi tah hen mato yohihahqui, hean yohihi joibo bihxon ta jaan mato honanmayaxihqui hahquin.

Benatax bi jenimacahinti shinan

¹⁶Man hea jisquin jenenon ta nea pishca sca jaiqui. Basima tahni hea jisyamascaipixon tah man hea hahquirihbi jisyaxihqui —Jesusen jato jaquin. ¹⁷Caibo sca jahuen haxenicabo yohinani:

—¿Jan yohuanai jahua hihquiquin? Man hea jisquin jenenon ta nea pishca sca jaiqui. Basima tahni hea jisyamascaipixon tah man hea hahquirihbi jisyaxihqui. Hea heen papa qui cahiya jan hihqui bi ¿jahua yohihi jascarihquin? ¹⁸¿Basima sca jan hihqui bi jahua hihcatsihquiquin? Jan yohihi tah non honanyamahi —hihcani.

¹⁹Yocacatsihqui bo hih honanxon Jesusen jato yohiquin:

—Man hea jisquin jenenon ta nea pishca sca jaiqui. Basima tahni hea jisyamascaipixon tah man hea hahquirihbi jisyaxihqui hen mato yohihah copi ¿jaa jahua hihcatsihquiquin hah man yocacahanan jayamahin? ²⁰Hen mato yohinon nincanahue: man tah man huinitih, huaohihqui, mai mehabo jenimanon. Bena benatax bi tah man hilti jenimaribitih. ²¹Jahuen baquexo bihti nete nocotaiya ta hisinxon jahuen baque caincatsihquin haibaan masa shinanihqui. Jahuen baquexo bihresscaxon sca ta jan masa shinanah shinanbehnoscaiqui. Joni behna noquen

neten jahui copi jenimahi. ²²Mato jascarihibi. Rahma masa shinanax bi tah man jointinin jenimayaxihqui, hen mato hahquirihbi jisiya. Man jenimahi yohuan ta tsoanbi mato bichintimahihqui.

²³Jaa neten tah man hea jahuabi yocayamayaxihqui. Man honannon hihxon ta hen yohihi: man queenaibo man heen janen noquen naihoh queha Papa yocacah ta mato hinanyaxihqui. ²⁴Rahma caman tah man jahuabi heen janen yocayamahi. Yocanahue. Jenimanoxon tah man bihtihi.

Mai mehabo Jesusen cahnetimahi

²⁵Papan jihuemati ta jascapah qui hahxon tah hen mato haxemapahoniqui. Huetsa tian tah hen jaa patax queha joi mato yohiyamascatihi, heen Papan joi mato yohiquin sirijascaquin. ²⁶Jaatian tah man heen janen yocayaxihqui. Mato qui tah hen noquen Papa yocaxonyaxihqui hah ta hen jayamahi. ²⁷Man hehon shinanxon heen papa janinhax hea joní man shinancoinai copi ta matohon shinanihqui. ²⁸Heen papa janinhax tah hen joniqui. Naihoh quehax jonish tah hen hahquirihbi heen papa qui cahi, mai mehax sca —jato jaquin. ²⁹Jahuen haxenicabaan sca yohiquin: —Rahma caya tah min yohiquin sirijahi, jaa patax queha joima. ³⁰Mian tah min jatihibi honanai. Noquen tah non honanscai. Jahuabi yocacahtima sca tah non jai. Non tah non honanscai. Jaa copi tah non hihcoinai shinanai, Mia tah min Papa Dios janinhax joniqui —hahcanquin. ³¹Jesusen jato yocaquin: —¿Man rahma nincacoinscain? ³²Hea huesti hihnon tah man jabacahini cahax jabisnoxihqui. Jaabi tah hen hea huesti hen banetimahi, heen papa ta hehbetan hihtihiqui. ³³Heen shinan bihxon man shinanquin sirijanoxahnon hihxon ta hen

mato yohihahqui. Mai mehax tah man hohmis hohmisyaxihqui. Jascarax bi jenimanahue. Mai mehabo ta hen namanjasca jai.

Jahuen haxenicabo Jesusen yocaxonai

17 ¹Jato jascajaquin yohixon nai bejisahnan sca yohiquin: —Hen tah hen janquenjascai, Papan. Hea miin baque nete hihbohi jato honanmascahue, mia nete hihbohi honanahbo, hean rihbi jato honanmanon. ²Hen mia hinanai jatihibi teehihmanoxon jatihibi yorayahpabo hihbojahue hah tah min hea janiqui. Jahuentianbi queyoyamanox manati jihuetahbo tah hen jato teehihmascatihi. ³Mia huesti tah min Papa Dios coin qui. Queyoyamanox manataibo ta mia honanax jihuetaibo qui. Mia honanxon, hea mian raanni Jesucristo rihbi honanax ta jihuecoinnicabo qui.

⁴Hen hahxonon min hea hinanni tee queyoxon tah hen mainxon hen mia nete hihbohi jato jismapahonihqui. ⁵Mai tsahonrihyamahax bi tah hen mihbetan nete hihbo hihquish xabanihqui. Mia jano jaiton sca hea rihbi nete hihbohi jisibo heen xaba jato jismahue, Papan.

⁶Min hea hinanni mai meha jonibo tah hen noquen Papa jenquetsahpa quin hahxon jato honanmaniqui. Minabo tah min hea hinannihqui. Miin joi ta bihresscacanishqui. ⁷Min hea hinanni joibo jatihibi ta mina qui. Jaa ta honanscacanishqui. ⁸Min hea hinanni joi hean jato hinanah ta honancaniqui. Jaa bihcoinxon ta mia janinhax hea joní honancoincaniqui. Mian min hea raanni ta hihcoinjauquin shinancoincaniqui.

⁹Jaabo ta hen yocaxonai. Mai mehabo yocaxonma bi tah hen min hea hinannihbo hen yocaxonai. Jaabo ta mina qui. ¹⁰Henabo jatihibi ta mina qui. Minabo jatihibi rihbi ta hena qui. Jaabo

heen shinanyahpabo quen ta hea nete hihbohi honancantihiqui, mai mehabaan.

¹¹Rahma tah hen mai mehabo tocan hihyamascai. Jaabo res ta mai mehabo tocan hihquiqui. Mihqui tah hen cahi. Hahan min hea janeni miin janen jato coiranhue, jaabo huesti hihnon, noque rabe non huesti hihqui quescarihibi. ¹²Jato betan hihxon tah hen min hea hinanni miin janen jato coiranpahoniqui. Hean jato coiranah ta tsoabi manoyamahihqui. Nincayosma tiroma huesti res ta manotihqui, huishani joi jai quescabi janon.

¹³Mihqui sca tah hen cahi. Mainxon tah hen nea joibo mia yohihi, hea jenimahi hihqui quescarahbo. ¹⁴Miin joi tah hen jato yohiscaniqui. Hea mai mehama hihqui quescarihibi ta jaabo mai mehaboma quen mai mehabaan jato jistahimahihiqui. ¹⁵Mai janinha jato tsecahue hah ta hen jayamahi. Tiroma yoshiman jato jahuejayamanon jato jixonhue hahquin tah hen jato yocaxonai. ¹⁶Hea mai mehama hihqui quescarihibi ta jaabo mai mehamabo qui. ¹⁷Nincacointi shinan jato hinanxon hihcoinaí join jato mequexonhue. Miin joi ta jaa joi qui, hihcoinaí joi. ¹⁸Mian min hea mai mehabo tocan raanni quescararibiquin tah hen jato raanscai mai mehabo tocan canon. ¹⁹Hihcoinaí joi honanxon mihqui hinamehxon teneti shinan bichibo tah hen jaton hohcha copi hen hinamehtai.

²⁰Jaabo res ma tah hen yocaxonai. Jaabaan sca yohihah hea nincacoinyaxihquibo rihbi ta hen yocaxonai. ²¹Jaabo jatihibi huesti yora hihnon, mia hehbetan hihqui quescari, hea rihbi mihbetan hihqui quescarihibi, noque betan jaabo huesti yora jihuenon. Non jascaraiya ta mian min hea raanni honancoinyaxihquiqui jonibaan. ²²Min hea hinanni coshi shinan tah hen jato

hinanrihbinihqui, jaabo huesti hihnon, noque non huesti hihqui quescarihibi. ²³Jato betan tah hen jihuetai. Hehbetan rihbi tah min jihuetai, jaabo rihbi huesti yora siripi jihuenon. Jascaraiya ta min hehon hihti queenai quescarihibi, hea raanax min jatohon hihti queenai mai mehabaan honanyaxihquiqui.

²⁴Jano hea jaiton min hea hinanni jonibo rihbi jati tah hen queenai, Papan, nete jariyamanon hehon queenxon min hinanni coshi jisibo. ²⁵Mai mehabaan mia honanyamahi bi tah hen hean mia honanai, Papan. Hea min raanni rihbi ta heen jonibaan honaniqui. Mian tah min pontejaquin shinanai. ²⁶Hahxonnica Papa siri min hihqui jato honanmanixon bi tah hen jato honanmarihbitihi, min hehon queenxon hahxonni quescararibiquin jatohon shinanxon min jato hahxonnon. Hea rihbi jato betan hihnoxon tah hen jato honanmanoxihqui.

Jesus bichibo

(Mt. 26.47-56; Mr. 14.43-50; Lc. 22.47-53)

18 ¹Jascax jahuen haxenicabo betan cahax Cedron janeya texpa pohquetax jano huai jaiton cahí. ²Jesus bihmacatsihqui Judasen ta jaa huai honanrihbinihqui, jaa huai chian jahuen haxenicabo betan Jesus cahiya cahen jaa rihbi jano capahoni. ³Jano Jesus cahí honanxon sontarobo sca benaxon sacerdote hapobo janin porisiabo rihbi benaxon jaa huai chian jato hioquin. Caibo johueyahpabo, caibo ramparinyapabo, jaton jashiya bocani. ⁴Huai chian nocotaiton Jesusen jato behchiquin. Jahuejanoxihquibo jatihibi honanax, jato behchihí cainxon yocagain: —¿Tsoa man benahin? —hahquin. ⁵—Nazaret janinha Jesus rahan —hihcani. —Hea ta hen qui —hihqui Jesus. Jesus bihmanica hihquish Judas jato betan nichí.

⁶Hea ta hen qui Jesus jaiya jaabo chitihhrenenax paqueti miracahrenenani.

⁷—¿Tsoa man benahin? —jato jaribiquin.

—Jesus Nazaret janinhah rahan —hihcani.

⁸—Hea ta hen qui hih ca hen jai sen. Hea benaxon heen jonibo jenenahue, botanahbo —Jesusen jato jaquin. ⁹Min hea hinanni jonibo tah hen ni huestibi manomayamahi jan yohihah quescabi janon hihxon jascajaquin. ¹⁰Simon Pedronen sca machito jaxon, tsecaxon, sacerdotenin joni reraquin bi mecayahores paxtebahinquin. Malco ta jaa jonin jane qui.

¹¹—Miin machito bexojahue. ¿Heen papan hea jascajahue hahca hen hahtimahin? —Jesusen Pedro jaquin.

Jaton hapobo janin Jesus bohibo

(Mt. 26.57-58; Mr. 14.53-54; Lc. 22.54)

¹²Jaatian sontaro hapon yohihah porisiabo betan jahuen sontarobaan Jesus bihtanxon menexcanquin. ¹³Menexxon Anasen xobo janin pari bocanquin. Anas cahen Caifasnen coca. Caifas cahen jaa bari tian sacerdote hapo hihpahoni. ¹⁴Caifas ta Huetsa jonibo jihuenon huesti joni mahuatah ta siri qui hihnicah qui.

Jesus qui Pedro paranahti

(Mt. 26.69-70; Mr. 14.66-68; Lc. 22.55-57)

¹⁵Anasen xobon bohiboya pari ta huetsa jahuen hahbe haxenica betan Simon Pedronen jato chibanbonanishqui, Jesus bohiboya. Jahuen hahbe haxenica ta sacerdote hapon honannishqui. Jaa copi ta sacerdote hapon xoboho mapetaiboya jemanhihti janin jahuen hahbe haxenica hihconishqui. ¹⁶Jaa hihcohi bi jemanhihti xehqui senenbi Pedro banereneni. Jahuen hahbe haxenica sca sacerdote hapon honanai

joni hihquish picoxon xehpoti coirannica haibo yohixon Pedro hihcomaquin, jemanhihti janin. ¹⁷Jemanhihti janin nichiton sca xehpoti coirannica haibaan Pedro yocaquin:

—¿Mia rihbi min jahuen haxenicama quin? —hahquin.

—Jaama ta hen qui —hihqui Pedro.

¹⁸Matsihiya sca cahen hapon jonibo betan porisiabaan chihi requenjaquin. Perekihquia jano pehchicani. Pedro rihbi jato betan pehchihni nichini.

Hapobaan Jesus yoca yocacai

(Mt. 26.59-66; Mr. 14.55-64; Lc. 22.66-71)

¹⁹Xoboho cahen jaton hapo yocacahiti: —¿Tsoabo miin haxenicabo quin? ¿Jahua yohiquin min jonibo haxemahin? —hahxon yocapaquequin. ²⁰Yocacah Jesusen yohiquin:

—Janibixon tah hen jatihibi joni yohirahsihi. Maton tsinquitit xobohoxon haxemaxon, Papan xobohoxon haxemaxon, jano judiobo tsinquitaiton tah hen jato honanmarasihi. Jonexon tah hen jahuabi yohiyamarahsihi. ²¹¿Jahua copi sca min hea yocacain? ¿Hea nincarahsihibaan jahua yohihipishquin? Jaabo caya yocahue. Jascajati ta jaiqui. Hen yohirahsihi nincaxon ta honancaniqui —hahquin. ²²Jascachiton:

—¿Jascajaquin min sacerdote hapo joi bichinain? —hahxon jaa senenbi nichini porisiane Jesus copatsahquin.

²³—Ponte hen yohiyamahiya Jascama ta qui hahhue. ¿Hen ponte yohihiya jahua copi sca min hea rishquihin? —hahquin Jesusen. ²⁴Jaatian hahquirihbi menexti jato yohixon Caifas janin sca Anasen jato raanquin, Caifas hashoan hapo copi.

Pedro Jesus qui paramehribihi

(Mt. 26.71-75; Mr. 14.69-72; Lc. 22.58-62)

²⁵Xoboho pari jaabo jai bi jemanhihtin Pedro nichini pehchihni.

—¿Mia rihbi min jahuen haxenicama quin? —hahcanquin.

—Jaama tah hen qui —hahquin, Jesus qui paramehquin. ²⁶Sacerdote hapon joni sca Pedronen paxteha jonin jenabo hihxon yocaquin:

—¿Huai chian min hahbetan nichu hen mia jisyamahaquin? —hahquin.

²⁷Jascajaquin yocacah hahquirihbi jahuen joni hihtima yohiquin. Jaatianbi sca hatapa queoscai.

Pilato qui Jesus nocoti

(Mt. 27.1-2, 11-14; Mr. 15.1-5; Lc. 23.1-5)

²⁸Caifasnén xobo janinhax picoxon gobernador xoboho sca Jesus bocanquin. Xaba paquecatsihscái. Nahuan xoboho mapetax rishtaxon non pascua fiesta piti hahtipahyamamis hihquish jahuen xoboho mapeyamacani. ²⁹Jaa copi jato qui Pilato picoti.

—¿Jahua man hahqui yohuanain? —jato jaquin.

³⁰—Tiroma joni hihyamahiya cah non mia hinanyamahan —hahcanquin.

³¹—Boxon, maton xenibaan huishanishbo joi jisxon jaa joi jai quescajaquin hahnahue matonbi —Pilatonen jato jaquin.

—Noquen cah non rehteti hahtipahyamahi. Noquen rehtetima joi ta jaiqui —hahcanquin. ³²Jascajaquin ta hea rehteyaxihcanihqui hahxon Jesusen jato jaipi quescabijaquin janon, jascajacanquin. ³³Jahuen xoboho hihcorihbixon Jesus quenaxon Pilatonen yocaquin:

—¿Mia min judiobaan quiquin hapo quin? —hahquin.

³⁴—¿Mianbi shinanxon min hea yocacain? ¿Caibo hehqui yohuanah min hea yocacain? —hahquin Jesusen.

³⁵—¿Hea judio quin? Jatón sacerdote hapobo betan ta miin caibaan mia hihuxon hea casticanmacatsihquiqui.

¿Jahuejah min jaipiquin? —Pilatonen jaquin.

³⁶—Hean hihboti ta nea mai mehama qui. Nea mai meha heen hihboti jaiya cahen heen jonibo coshichinquehanihqui, judiobaan hea bihyamahahbo. Nea mai mehama ta heen hihboti qui —Jesusen jaquin.

³⁷—¿Mia min quiquin hapo qui nan? —Pilatonen yocaquin.

—Quiquin hapo hea hihqui hah tah min miabi jai. Jaamama jaabijaquin yohinoxon tah hen cainnihqui. Jaa copi tah hen nai naman joniqui. Jatihibi hihcoinau yohuannicatón ta heen joi nincaquihqui —hahquin Jesusen.

³⁸—¿Hihcoinau jahua quin? —hihscai Pilato.

Jesus rehteti yohihibo

(Mt. 27.15-31; Mr. 15.6-20; Lc. 23.13-25)

Jascaxo Pilato caini judiobo qui.

—Jahua hohchabi ta hen jisyamahi.

³⁹Pascua fiesta tian yocanicabo tah man qui, hen sipo xoboho tsahonni huesti mato picoxonnon. ¿Judiobaan quiquin hapo hen mato picoxonti man queenyamahin? —jato jaquin.

⁴⁰—Jaama bi Barrabas —hahcanquin, coshin bi res. Barrabas ta yometsoh hihpahonishqui.

19 ¹Jaatian sca Jesus rishquihahbo jahuen sontarobo Pilatonen yohiquin. ²Sontarobaan sca rishquixon moxa maitijaxon Jesus maimaquin. Yancon tari rihbi sahuemacanquin, hapon tari. ³Sahuemaxon hahqui jori jorixon:

—Jihuehue, judiobaan quiquin hapon —hahcanquin. Jascaxaxon tihibi tantashahcanquin.

⁴Jaatian judiobo qui Jesus hahquirihbi picoxon Pilatonen jato yohiquin:

—Jisnahue. Man jisnon tah hen mato jismahi. Hean jisi ta jahuen hohcha

yamahihqui. Man honannon hihxon tah hen mato yohihi.

⁵Jascahiya Jesus picoscai, moxa maitiya, yancon tariya.

—Nea tah qui —jato jaquin Pilatonen.

⁶Sacerdote hapobo betan porisiabaan sca Jesus meraxon coshin yohiquin:

—Jihuín hueonhue. Jihuín hueonhue —hahcanquin.

—Jihuín hueonnahue matonbi. Jahuen hohcha ta yamahihqui, hean jisi bi —jato jaquin Pilatonen.

⁷—Huishani joi tah non noque jai. Hea ta Diosen baque qui jan jai copi tah non jaa rehteti jai, noquen nincati joi nincaxon —hahcanquin.

⁸Jascaraibo nincacax Pilato hashoan raquescai. ⁹Jahuen xoboho hihcorihbixon Jesus yocarihbiquin:

—¿Jahuerahnohah mia quin?

—hahquin. Yocacah bi jahua hihiyamahi.

¹⁰Jahua hihiyamahiya Pilatonen yocaquin:

—¿Min hea yohicatsihyamahin? Mia tah hen picoti hahtipahi. Mia jihuín hueonxon rehteti tah hen hahtipahribihi ¿min honanyamahin? —hahquin.

¹¹—Naihohxon mia coshi

hinanyamahah tah min hea jahuejati hahtipahyamaquehanai. Jaa copi ta hea bihxon mia hinanai joni hashoan hohchaya qui —Jesusen Pilato jaquin.

¹²Jascahah Pilatonen picocatsihqui bi judiobo coshin yohuani:

—Min jaa picohi tian tah min quiquin hapo Cesaronen hamicoma sca min jatihi. Jatihibi quiquin hapocatsihquibo ta Cesaronen rahuibo qui —hahcanquin.

¹³Jascaraibo nincaxon Jesus

cainmahax, casticanti yohinoxon janoxon yohiti tsahotinin tsahopaqueti. Gabata janeya jemanhihti janin, judiobaan join cahen Gabata macan champani tapojahibo hihcatsihquiqui. ¹⁴Pascua fiesta piyanoxon jaton pitijati neten barin

manan tsacahiya cahen jano tsahoxon judiobo sca Pilatonen yohiquin:

—Nea ta maton quiquin hapo qui —hahquin. ¹⁵Jascahiya sai saihihscacani: —Rehtehue. Rehtehue. Jihuín hueonhue —hihcani.

—¿Maton quiquin hapo hen jihuín hueontihin? —Pilatonen jato jaquin.

—Cesaro huesti ta noquen quiquin hapo qui, huetsama —hihcani sacerdote hapobo. ¹⁶Jaatian jihuín hueonahbo sca jato Bihnahue hahquin. Bihnahue hahca Jesus bihcanquin.

Jihuín hueonaibo

(Mt. 27.32-44; Mr. 15.21-32; Lc. 23.26-43)

¹⁷Bihxon boxon jahuen coros hiamabahincanquin. Cahax mapo xao janeya manan qui nococani. Judiobaan join cahen Gólgota. ¹⁸Janoxon sca tasaxon nichinxon jihuín hueoncanquin. Huetsa joni rabe rihbi

jascajarahbicanquin, ramiho huetsa nichinxon ramihoh rihbi huetsa nichincanquin. Naponbi cahen Jesus.

¹⁹Quirica huishamaxon ta Jesusen coros qui Pilatonen jaa quirica

hueonmanishqui: Nazaret janinha Jesus, judiobaan quiquin hapo hihqui jaa quirica. ²⁰Hihti caiboxon ta judiobaan jaa quirica jisnishqui, jema hochoma hueonaibo quen. Judiobaan join huishaxon bi Latin join rihbi hahxon, Griego join rihbi huishahah, jaa quirica. ²¹Jaa quirica jisxon judiobaan hapobaan sca Pilato yohicanquin:

—Judiobaan quiquin hapo hahquin huishayamahue. Judiobaan quiquin hapo ta hen qui jan hahcai, hahquin huishahue —hahcanquin.

²²—Hen huishahah ta huisha sca qui —hahquin Pilatonen.

²³Jihuín hueonxon sca ta jahuen chopabo sontarobaan bihnishqui. Chosco sontaro hihquish jahuen chopa

metisihpaquecani. Jahuen tari sca cahen metisihpanan rechijoma hihnish, jahuen tepan janinhax jahuen quecato caman saya.

²⁴—Jahuen tari huaxayamanahue. Tsoana banetihiquin hihxon macan bero pishca borasa qui nanexon chicoti ta jaiqui —hihcani. Jascaxon huishani joi janí quescabijacanquin.

Heen chopabo ta bihpaquecanihqui. Heen sahueti bihnoxon ta macan bero potacaniqui.

hihqui jaa joi. Jaa joi jai quescabijaquin cahen sontarobaan hahquin.

²⁵Jasca jaibaan bi Jesusen coros patax jahuen mama, jahuen mama huetsa, María Cleofas haibo, María Magdalena, jaabo nichí. ²⁶Jahuen mama jisxon hahan jan queenai jahuen haxenica rihbi hochoma nichí jisxon jahuen mama Jesusen yohiquin:

—Hoa ta miin baque qui, maman —hahquin. ²⁷Jahuen haxenica sca yohiquin:

—Nea ta miin mama qui —hahquin. Jaa copi ta jahuen xoboho sca jaa haxenicaton Jesusen mama jihuemanihqui.

Jesus mahuatai

(Mt. 27.45-56; Mr. 15.33-41; Lc. 23.44-49)

²⁸Jaatian sca jatihibi janquenja sca jan jai honanxon huishani joi jai quescanon hihquish:

—Xehan tah hen hihqui —hihqui Jesus. ²⁹Jano cahen tason bocho xehati cachani tsahoti. Jesus jascaraiya sca taco quescapa hahan maosahxon mehchajaquin, jashi taxoyaxon jahuen jana janin sanancanquin. ³⁰Cachani tanahax sca:

—Janquenja sca ta jai —hihqui. Jascarax jahuen mapo betihiquish mahuati.

Sontaronen Jesus pishnaco

³¹Pilato janin caxon sca pitijati nete sca jai copi, Janin yamenon mahuamati ta

jaiqui hahxon judiobaan yocaquin. Jatón huihtax tobanon yohihue, mahua sca jaiton jatón yora botonxon botanahbo hahcanquin yocaquin. Tantiti neten jatón yora coros janin hueoyamanon hihxon jascajacanquin. Jaa tantiti nete jatón hani fiesta nete hihqui copi.

³²Tobatannahue hahca sontarobaan caxon jaa senenbi hueonah rabebi jahuen huihtax tobaxon huetsana jascajaribicanquin. ³³Jesus qui nocoxon sca mahuascai meraxon jahuen huihtax tobayamascaquin.

³⁴Tobayamaxon bi huesti sontaronen jashin Jesus pishnacoquin. Pishnacoha jimíya jene caini. ³⁵Jaa jisnixon tah hen mato yohicoinei, maton rihbi man nincacoinnon. Hen tah hen hihcoinei. Honancoinax tah hen hihcoinei maton rihbi man nincacoinnon hihquish.

³⁶Huishani joi jai quescabi janon ta tobayamacanishqui. Jahuen xao ta ni huestibi tobatimahiqui hihqui jaa joi.

³⁷Jaa pishnacoinei ta jaabi jis yaxihcanihqui hihqui huetsa rihbi huishani joi.

Jesus mihinaibo

(Mt. 27.57-61; Mr. 15.42-47; Lc. 23.50-56)

³⁸Jaa pecaho Arimatea janinhax José janeya joni joxon Pilato yocaquin Jesusen yora botannoxon. Jaa José cahen nincacoinnica. Nincacoinnicaxon bi judiobo qui raquexon tsoabi yohiyamaquin. Rahma sca jahuen yora yocaquin. Yocacah Pilato jeen hihqui. Jeen hihquiya caxon jahuen yora botonxon boquin. ³⁹Jesusen haxemamenohiya hahqui yame canicah rihbi jahui, Nicodemo. Mirra, áloe jahan hinintibo mesco bequin hicha. Hahan mihinti rahobo jan behi cahen cuarenta kilo hihuepai. ⁴⁰Jesusen yora bihxon judiobaan hahpahoni quescajaquin hahan hininjatiya bi joxo chopa quexen

yabi yabicanquin. ⁴¹Jano hueonahbo janin cahen jihui huai jai. Jaa huai janin rihbi mai poquin behna jai, jaho tsahonti quini, jano tsoabi tsahonrihyamahi. ⁴²Jaa tsahon hochomahi copi janobi Jesus tsahonbahincanquin pitijati neten copi hishtocani.

Jesus huenirihbihi

(Mt. 28.1-10; Mr. 16.1-8; Lc. 24.1-12)

20 ¹Jahan semana pehocotai neten sca hihari xaba paqeri jaima tsahon janin María Magdalena jahui. Nocoxon hahan tsahon behpohipibo macan taranbohanah sca jisquin. ²Bishquihicanahi caxon Pedroya huetsa haxenica yohiquin. Jaa huetsa cahen jahan Jesus queenai joni.

—Tсахon janinhah ta noquen hihbo tsecanaxqui. Jahuerahnon racanaxquin tah non honanyamahi —hahquin.

³Yohiha jaa huetsa haxenica betan picotax tsahon janin bishquihicanahi Pedro cahi.

⁴Rabebi bishquihicanahax bi jaa huetsa pari tsahon janin nocoti, hashoan coshin cahax. ⁵Cahcopaquexon najisquin. Hahan yabihipibo joxo chopa jano tsamana jisish bi hihcoyamahi. ⁶Hahchon sca Simon Pedro nocoti. Jahuex pontecahini tsahon quiniho hihcohi. Hihcoxon jisí bi jahuen chopa quexe tsamanah racati. ⁷Hahan bebepohipibo payon cahen huetsanco, joxo chopa quexebo betan racayamahi. Jaa cahen hahmebi boxca boxcahah racatan.

⁸Huetsa sca tsahon janin hihcohi, jaa pari nocotax bi chini hihcohi. Jisxon, Bohancoin ta jacanaxqui hihqui shinancanquin. ⁹Jaa hihquish bi hahquirihbi teehihtih hihqui huishani joi honanyamaxon jascajaquin shinanquin. ¹⁰Jaatian sca jaton xoboho rabebi caribihi.

María Magdalena qui Jesus sanareneni

(Mr. 16.9-11)

¹¹Tсахon patax banetax María nichí, huaohihqui. Huaohihanah

cahcopaquexon tsahon najisquin. ¹²Jisí bi Papan yonoti rabe. Jano Jesusen yora racanipi janin joxo chopayahpa yonoti rabe tsahotai. Tsahon mapo quiri huesti tsahoti, tahe quiri huetsa.

¹³—¿Jahua copi min huaohihquin, haibon? —yocaquin.

—Heen hihbo hea bohanahbo copi, rahan. Jahuen racanaxquin hen ta hen honanyamahi —hihqui María. ¹⁴Jascahah rabejaquexon jisí bi janobi Jesus nichí. Jaa que bi Marian honanyamaquin.

¹⁵—¿Jahua copi min huaohihquin, haibon? ¿Tsoa min benahin? —Jesusen yocaquin.

Jaa huai hihbo hihqui shinanxon:

—Huetsanco hea bohanxon jahuen min racantanai hea yohihue, jonin, hen botannon —hahquin haibaah, jisxonma.

¹⁶—Marian —hahscaquin Jesusen. Jascahah rabejaquetax judiobaah join yohuani:

—Raboni —hihqui. Maestron hihcatsihqui, jaton join.

¹⁷—Hea xecoyamahue. Heen papa qui tah hen hinahihnarrihyamahi. Heen huetsabo yohitanhue, hea heen papa qui, maton papa qui, heen Dios qui, maton Dios qui hea hinahihnatai yohitanhue.

¹⁸Yohitanhue hahca caxon jahuen haxenicabo María Magdalenanen yohiquin:

—Noquen hihbo tah hen jistanai —jato jaxon jan nincacah jato yohiquin.

Haxenicabo qui Jesus sanareneni

(Mt. 28.16-20; Mr. 16.14-18; Lc. 24.36-49)

¹⁹Jaa pecaho sca jaa neten, hahan jaton semana pehocotai neten, jano jaabo jai xoboho mapexon judiobo qui raquexon jahuen haxenicabaah xehqui xepoquin sirijaquin. Bepiscaiya sca jahuex jato tocan Jesus nihreneni jahui.

—¿Man siripi jayamahin? —jato jaquin. ²⁰Jato jascjaxon jahuen mequen

jato jismaquin. Jahuen pishi jato jismaquin. Noquen Hihbo jisish jahuen haxenicabo jenimahi. ²¹Jato yohirihbiquin:

—¿Man siripi jayamahir? Heen papan hea raanni quescajariquibiquin tah hen mato raanai. ²²Jato jascajaquin yohixon jato xoonhahxon:

—Dios Yoshin bihnahue —jato jaxon— Man huetsa joni hohcha sohuamahiya tah hen jaa sohuaxontihi. Man huetsa joni hohcha sohuamayamahiya ta jahuen hohcha jascabi jaiqui —jato jaquin.

Teehrihribihi Tomasen jisquin

²⁴Rabe nane janeya Tomas ta jahuen doce haxenica janinha huesti janishqui. Jesus jahui bi cahen jato betan Tomas hihyamahi. ²⁵Jaa copi cahen jahuen hahbe haxenicabaan yohinish:

—Noquen hihbo tah non jisiqui —hahcanquin. Yohihahbaan bi:

—Jahuen mequen janin clabon metasipi quini jisyamaxon, jaa clabon quini janin heen metoti rihbi niyamaxon, pishnacohipibo janin heen mequen rihbi niyamaxon tah hen hihcainai shinantimabirestihi —jato jaquin.

²⁶Jan jascahipi ocho neten sca jaa xoboho jahuen haxenicabo hahquirihbi tsinquit. Jato betan Tomas hihqui. Xehqui xehpotai bi jato tocan Jesus nihreneni jahui.

—¿Man siripi jayamahir? —jato jaquin.

²⁷Jato jascajaxon Tomas sca yohiquin:

—Miin metoti niahi johue. Heen mequen jisihue. Heen pishi janin miin mequen niahi johue. Paranaibo shinanyamahue. Hihcainai shinanhue —hahquin.

²⁸—Heen hihbo, heen Dios —hihscai Tomas.

²⁹—¿Hea jisxon copi min hihcainai shinanain? Jisxonma bi hihcainai

shinanaibo ta hahan jenimati jaiqui —Jesusen jaquin.

Non jihuenon Juaman huishahi

³⁰Jahuen haxenicabaan jisnon bi hicha hahan honantibo Jesusen hahní bi tah hen nea quirica huishaxon texe res yohihi; hashoan hicha jan hahnibo tah hen yohiti pishinai. ³¹Jaabi Jesus noquen Papa Diosen baque Cristo hi man honancoinnon hihxon tah hen nea huishahahqui, nincacoinax Jesus qui hinamentax man jihueyaxihnon.

Sietebo qui Jesus sanareneni

21 ¹Jascari jato qui cainipish cahen Tiberias hian quexa sca jahuen haxenicabo qui Jesus sanareneni joribinish. Jan sanareneni jahui ta nescanishqui.

²Simon Pedro, Rabe nane janeya Tomas, Galilea mai meha Cana jema janinha Natanael, Zebedeon baque rabe, huetsa jahuen haxenica rabe rihbi, jaabo jano hihcani.

³—Hea tah hen tsatsa benahi cahi —Simon Pedronen jato jaquin.

—Cahue non mihbetan canon —hahcanquin. Cahax nontin nanecani.

Tarrafa potashinaxon bi jahuabi bihyamacanquin. ⁴Xaba paquescaiya quexabi jahuex Jesus nihreneni. Jesus que bi jahuen haxenicabaan honanyamaquin.

⁵—¿Man tsatsa bihyamahin, heen baquebaan? —Jesusen jato jaquin.

—Bihyama tah non jai —hahcanquin.

⁶—Mecayaho sca tarrafa potanahue. Jano tah man meratihi —jato jaquin. Jascahah potaxon bi naneti hahtipahyamascacanquin tsatsa hichahiya. ⁷Hahan Jesus queneai jahuen haxenicaton sca Pedro yohiquin:

—Noquen Hihbo tah qui —hahquin. Chohanma teexon bi Noquen Hihbo tah qui hihqui nincaxon jahuen chopa

Pedronen sahuequin. Sahuehax jenenencanya cayahi. ⁸Texe jahuen haxenicabo nontin taxnati cahi. Tarrafa tsatsa bochohi ninibonahi cahax taxnacani, quexa hochoma hihquish cien metro tihixonpahi. ⁹Mapexon tsiste requeman tsatsa xohihi meracancuin. Paan rihbi jano racatai meracancuin.

¹⁰—Man rahma rahcohi tsatsa pishcaya benahue —Jesusen jato jaquin. ¹¹Nanexon jaton tarrafa ninibenaxon Simon Pedronen mapemaquin. Hanibo tsatsabo tarrafa bochohax bi huaxayamahi, ciento cincuenta y tres tsatsa.

¹²—Pihí benahue —Jesusen jato jaquin. Tsoa min quin tsoanbi jahuen haxenicaton yocayamaquin, raquexon. Noquen Hihbo hihqui honanscancuin. ¹³Joxon paan bihxon Jesusen jato hinancuin. Tsatsa rihbi jato hinancuin.

¹⁴Jaa cahen jahuen quimisha coti sca jan hihquipish bi hahquirihbi teehihquipish jahuen haxenicabo qui jaa sanareneni jahui.

Pedro beten Jesus yohuanai

¹⁵Piquin jaabijahiboya Simon Pedro sca Jesusen yohiquin:

—Simon, Juaman baquen, ¿neabo hehon queenai bi hashoan bi res min hehon queenain? —hahquin.

—Jeen. Mihon ta hen queenai, Hihbon. Min tah min honanai —hihqui Simon.

¹⁶—Heen carnerobo pimahue —haxon yocaribiquin jahuen rabe coti sca:

—Simon, Juaman baquen, ¿min hehon queenain? —hahquin.

—Jeen. Mihon tah hen queenai, Hihbon. Min tah min honanai —hihqui.

—Heen carnerobo pimaxonhue —hahscaquin Jesusen. ¹⁷Jahuen quimisha coti sca yocaribiquin:

—Simon, Juaman baquen, ¿min hehon queenain? —hahquin. Min hehon queenain hahquin jan quimisha coti

yocacai copi Pedronen masa shinanscaquin.

—Mian tah min jatihibi honanai, Hihbon. Mihon tah hen queenai. Min tah min honanai —hahquin Pedronen.

—Heen carnerobo pimaxonhue. ¹⁸Mia tah hen yohicoinai: beronan hihquish tah min miin chopa sahuehax min jano queenaiton nihpahoniqui. Yosiboscaax tah min miin mequen cataxon sanatihí, huetsan mia sahuemaxon jano min cacatsilyamahiton mia bonon —hahscaquin Jesusen. ¹⁹Jan yohihi ta jascahahbo mahuaxon noquen Papa Dios Nete Hihbohi Pedronen jato honanmayaxihquiqui honanahbo. Jaa pecaho:

—Hea chibanhue —Jesusen Pedro jaquin.

Jahan jan jenimahi haxenica

²⁰Rabejaquexon hahan Jesus queenai jahuen haxenicamen jato chibanbenahi Pedronen jisquin. Jaa cahen pihiboya Jesus senenbixon yocaquipi, Tsoan mia parannoxihquiquin, Hihbon, hihnicah. ²¹Jaa jisxon cahen Pedronen Jesus yocauquin:

—¿Hoa cahran, Hihbon?

²²—Hea jonon caman jaa manati hen queenaiya, ¿mihqui jahua hihti quin? Mian hea chibanhue —Jesusen jaquin. ²³Jaa copi ta jaa pecaho hicha noquen huetsabo jaya joihí yohuanpahonishqui:

—Jaa haxenica ta

mahuayamayaxihquiqui —hihcáni. Jasca que ma bi Jaa ta mahuayamayaxihquiqui Jesus hihyamani. Hea jonon caman jaa manati hen queenaiya, mihqui jahua hihti quin hihresi. ²⁴Jaa haxenicaxon tah hen honancoinxon nea joibo huishahahqui. Honancoinxon yohuana joi tah qui. Non tah non honanai.

²⁵Hashoan hicha rihbi ta Jesusen hahnishqui. Jatihibi huishapaguehah rah cahen mai senenymascaan, quirica bochohi.